

Maki Naña Pa Ke Pan LE YU LALA Naña Amlelaga Visayuena Na Tusi Nene

Sunienas plas na tusi nini

Yaru naña siri maki nini, naga siri pano pa ñegas tai kiena li naleлагаena lala naña asumña amal ke pog mñarera lala e kiela maliena, komin yaru la naña pe amlelaga re poli asumña akawela ke amio la. Pelaga naña yaru la akawela manene amio la sanene, kila sane amal mñarera, a lavis aligan kiela lelagaena e Yesu Kristo. Ana yaru nene pisa panila sape monar asumalu mñarera e kiela lelagaena lala. Naga pisa panila sape Yesu Kristo ga pe yaru wo naña pisa meraravan Ntewa pan ita. Ana na visa meraravanen suri nene, naga pisayu suri telu.

Suri na sumo, naga pisayu sape Yesu naga pe narina Ntewa kemua lelaga naña sumña vano vano taÑatete ñisi pogos tai. Pe lelaga naña naga pe narina Ntewa rui, ana naga mëna sumña ñikeyon kinasinan ñelaga nene na logearen Ntewa, e sur la naña kila naga mloge piowa e tasnena. Ana komin naña naga pe narina Ntewa, naga mon la metavan navisawalena lala, pona navisi lala, pona Mosis mënaga.

Suri na lua, Ntewa pisawal rui sape Yesu, naga pe ñarin yaru wa naña naga mon manene metava naña sumña vano vano taÑatete ñisi pogos

tai. Naga pe ñarin yaru wa naña taulu make ñarin yaru wa na sumo lala.

A suri na telu, e yumñaena kiena Yesu naña naga pe ñarin yaru wa na mon manene metava, naga maren natamaliaen yeririna makega, ñarplan kiela milamulena viowa lala, kila la pe amarau re si poli, a mla malena naña ve uro re panila. Na kuþapñaena nasumo lala, la ape totou na kuþapñaena ga naña Yesu Kristo kila.

E marana na keviu lualima taaga pa taaga, yaru naña siri maki nini naga pisayu yaru laþasa e Tusi Marua naña amleлага märera e Ntewa. A naga pisa pa la naña naga siri maki nini panila, sape popon ataveve malena kiena la nene, vena akilia asumñalu märera silaga, vano vano-o tol luwasnen kiela maliena. A silaga, monar akira avisu Yesu, vena akilia ava awarpoyo e pog märera lala, naña asumña atol ke e yaru la naña asumña akila ke märera panila papisi. A na kilamakeen kiena visena, naga pis ruru pan kiena yaru lala, pisa panila sape monar avisuar ruru kiela maliena lala.

Komþasnen tusi la na nini

Visena þesa. Kristo kila meraravan Ntewa
panita 1:1-3

Kristo naga mon laa metavan navisi lala 1:4
—2:18

Kristo naga mon laa metavan Mosis amio
Yosua 3:1—4:13

Kristo naga mo laa metavan ñarin yaru wa lala
4:14—7:28

Naviranarena viu naga mon laa metavan navi-
ranarena marua 8:1—9:28

Kȗpȃpaena nȃpa Kristo kila naga mon laa
 metavan kȗpȃpaena marua lala 10:1-31
 Pelaga na lelagaena naga po pȃpisi 11:1—12:29
 Visena la nȃpa kila yaru la asum̄alu m̄arera, a
 visena maro 13:1-25

Yesu na mon la metavan li navisawalena lala

¹ Kiau erau le Yu lala, nakonua konua la rui Ntewa pisawal kiena visena yam mokliu pa kieta yermarua lala, e mrapa la moki a e ſelaga wo la nȃpa peve tȃpena, pimi molue kome kiena navisawalena lala. ² Ana nanagane, e legiena maro la nȃpa tesike e ne, naga pis mesmes nena pan ita pimi kome Narina Yesu. Narina ne nane nanua sumo, e nasiien yomarava, Ntewa miyum̄ae kome naga, lalua amliganar make pog a yo lala, a siraunia, Ntewa pisirlua Narina nena, mligan sur punu ga sike e limana, naga pe ſarun la. ³ Narina nene, naurarena kiena ne Ntewa tego e kiena malena, sane kus nena marana ne Ntewa veraga, pe totou na ſelaga kiena ne Ntewa. A nam̄arereraena na kiena visena m̄arera pȃpisi, naga ga ſuarar sur make ga na yomarava nini, a yo tȃpena m̄ena lala su ruru sum̄a ga. A naga ke narui naga tam̄an naga pimi kilavan make kieta mlamulen viowa lala, a pogos nȃpa kila make ruru kiena yum̄aena nene e yomarava nini, ſasupe si pa ma e peni, pa to metava e lepas nen Arimana na ſamarua, Parin Sȗpe nae ma e peni.

Yesu na mon la metavan navisi lala

⁴ Yesu totano e nene sanene, naga mon manene la metavan navisi la nȃpa asike ne, komin

kia naña naga p̄aria vanon kienā yūmāena, po manene la taulu kiela kia.⁵ Visae tevisu e Siriena Wa lala, visena moki naña sike ea naña asape Ntewa kila Narina mon manene la metavan navisi lala. E visena la ta nene, Ntewa pis pa kienā Navisaarena nena, sape

*“Ko na, nepisu sane p̄ane opim ope naruu nenaga,
a nepim nepe Arimomā kemua lelaga.”*

Yauena 2:7

A ta sina pisa m̄ena sanini, sape

*“Yoko in na neim neve Arimana, a yoko naga ve
naruu.”*

Sam2 7:14

Visena lua nene, Ntewa pe pisa re nena pa kienā navisi la ta poli, sape pe Narina Wa, ana pisa ga pa Yesu.⁶ A visen si tai, pisayu pogos naña Ntewa sinenan sape ligān narina m̄earu nene imi e yomarava, ana pisape

“Popon navisi make ga alotunia.”

Naw 32:43

⁷ E lepas kienā ne navisi lala, la akila yūmāena wo la mokliu, ana Visena Wa pisayu la, sape

*“Navisi kienā ne Ntewa lala aþar kienā visena, asa
ga lagi, ami yūmāe kienā ne Ntewa, asa ga
kapi.”*

Yauena 104:4

⁸ Ana pogos naña Visena Wa pisayu Narina ne Ntewa, sape naga mon manene la metavan navisi lala, pisayuia sane naga maran taaga sa ke Ntewa, pio naga Ntewa. Pisayu naga, sape

*“O Ntewa, kiomā lele wa na totanoena naga
mon lue ga na m̄eke ne. Plaki na kiomā
nasup̄enena, naga p̄elaga wo ke narui.*

⁹ Ko okekaran manene la p̄elaga naña po, ana yepmavin visuen p̄elaga viowa, ana kiomā Ntewa na mava naga mligan ko opa

*metava, opa manene la metava otaulu
kiom a erau lala, kila ko okekara keviu sa
na pa miyowauia ruru ko e ponotaninu wo
tai.”*

Yauena 45:6-7

¹⁰ A e visen si tai, tepisu na pa Ntewa na mavा pio Narina sape Su e, a pisayу pupia sur kerkeviu la na pa naga sii la, sape

“*Su e, ko ke narui ko opisirlua pur pes nen yomar-
ava, lumor a ga miyum en sinapane ma
metava.*

¹¹ *Ana sur la nene, yoko amenunu makea,
akokovio, ana yoko ko na osike osike lue.*

¹² *Sane takue marua tai, yoko osulowar la owar
plan la nenaga, a sane mom a kulsota
marua tai, yoko oyenlua nenaga, ana yoko
ko na ove urviu maran ve taaga silaga,
a kiom a kas la ta patete  isi pogos tai.”*

Yauena 102:25-27

¹³ A visen kien a ne Ntewa ta pena si sike ga wa, na pa pe pisali re pa navisi tai poli wa, ana pisa ga pa Narina naga taaga, sape

“*Ototano e lepasneu na  amarua, otom a sanene,
vano-o yoko neligan kiom a nasinekar lala
aim ave takue na vilanvanen lam a ea.”*

Yauena 110:1

¹⁴ Nane visena maro e lepas nene narui, na pa pisayу sanape na pa navisi kien a ne Ntewa lala la na amiyum ae kien a ga, la ape ninuna na waren kien a visena, a ape naiila itaena vena tetol natamaliaena, ana yaru tai sike ga wa naga mon metavan la make ga, nane Narina Wa ne nane Yesu, na pa Ntewa pis maro pan ita ea.

2

Nalologena wo viu kiena ne Yesu mon la metavan navisaluaena marua kiena Mosis

¹ Sanene, visena wo lelaga nalologena wo la naña temloge pa narui, monar tesitom urmi manene e la, monar touarar ruru mārerera. Visae peraga, tevisuaria sapisi korur yan plan ita si vetania.

² E lepas nen navisaluaena marua nasumo lala, navisi ga la aþpar pimi, ana kana visena ne lala amesmes ga, a amārera paþpsi. Ana na kilaroen kana visena make ga, a kana nalogeluen make ga, kana nakoaena ruru napo sike þa rui. ³ Ana nanagane, nalologena wo viu pimi tol ita þa rui, a naga keviu taulu manene navisaluaena marua nasumo. Sanene, visae tesitom korenan mrapa na kiesta natamaliaena naña sike ea, yoko taþatete nena toure vetan kana nakoaena nena-a þisa. Kiesta Suþe ke narui naga kila þesan lologena wo pimi māliv, a la naña amloge pisawal e kiligala, la apisawal liluen pimi pan ita, akila merarava van ita apisape lelaga. ⁴ A Ntewa māna miila naga e visena nene, naña naga kila kile lala, a sur nailanen lala, a yumāena lala na kiena namārereraena, a metavania, naga kiakian plan nalaena lala kiena ne Ninuna Wa pan ita ai naña naga sitom sape la vania. Ana tepisu sur la nene, tekilia tesape lologena wo kiena ne Yesu Kristo naga pe visena tai naña naga po manenea taulu kiesta navisaluaena marua ita le Yu lala.

Yesu ve Suþe e yomarava naña yoko imi na wa

⁵ Tekilia tesape Yesu naga mon la metavan navisi lala, komin naña e lepas na yomarava naña pimi ke ne, yoko Ntewa tapatete ligan navisi la ave supenia, ana mligan sike vatanon Narina. ⁶ Sur nene Tus Marua m̄ena pisa, e visen tai kiena ne Parin Suñe Tepet naña pisa pa Ntewa, sape

“Sur wo ya na sike e yaru, naña kila ositom manene naga sanene?”

?Pona ya ne kila om̄alivi ke e narina ne yeririna?

⁷ Nanua, omligan naga sike tanon navisi lala, ana nanene na yam plas la ga,

a nanagane, opisirlua si naga rui. Omligan naga metava e yo wo tai amio kana pupia naurarena a nawarwarena nena,

⁸ *ana omligan sur make ga sike vatanon kiena namäreraena.”* *Yauena 8:4-6*

Ana pogos naña Ntewa kila yaru ve þarun sur make ga, kila sane pe sur re nena tai naña naga pe pe supen re poli. Naga kila sane sape ve sanene, ana pimi tol nanagane, pe tepisu make re sur la e yomarava nini poli wa e kilamarata pa mapin sa naña Ntewa sinenania. ⁹ Sur la pere wa, ana silaga tekira tepisu ga Yesu, naña Ntewa pisirlua naga pa mon manene la metava. Nanua sumo Ntewa sinen miye ita papisi, ana kila Yesu pito tano yam plas la ga, kila naga patanon navisi lala, a kila naga þar manene pupia naloge viowaena na namarewoitaena, ana siraunia, pisirlua sina, paia ruruia amio naurarena nae peni.

Yesu pe kieta natamaliaena, pe kieta þarin yar wa

¹⁰ Pelaga na yumñaena kiena ne Ntewa na tamaliaitaena nene naga mesmesu, komin naga sii sur make ga, a sur make ga pe naga kiena, ana sinenan sape taulu maran si pupia ūegas nen narina la tai vetan yomarava nini, aim si ave kiena. Naga sinenan sape kila sanene, ana nakilaena na mārera papisi, ana māl mrapa taaga ga nakilaena, naga sanini: mrapa naloge viowaena kiena ne Yesu, naña Ntewa kila ga naga pimi pe yeririna, naga pe yar natepoen yomārua vena taulu kieta natamaliaena. ¹¹ Yesu kilia sumon ita sanene komin naga ke narui naña kila ita temekiki, kila narui naga kekaran naña pisu ita sane tepe mratava taaga ga temio. ¹² Visena telu e lepas nene apisa sanini. Tai sike e tus kiena ne Yauena lala, sane Yesu pis pa Ntewa, sape

*“Yoko nevisawal ruru kiomā kia va wolai lala,
yoko neieluar ko likan yeririna lala.”*

Yauena 22:22

¹³ Ta sina, pisawal naña Yesu mleлага e Ntewa sa ke naña temleлага e naga, visena naña sike e tus kiena ne Navisawalena Aisea, sape

*“In ke narui, naña kiau nawasineena, nemligan
sike e naga.”* *Ais 8:17*

Namaro, visena si tai kiena ne Aisea, pisayu Yesu amio wenla lala, sape

*“Nane in ke nane nesike nini narui, nemio narina
ne Ntewa tapena lala naña naga mligan la
e lumāu.”* *Ais 8:18*

¹⁴ Ana ita narina ne Ntewa la nini, ita make ga tepe yeririna, temio tasneta a kata kuruta, ana naña Yesu imi ve wenla kemua leлага e ita,

naga pimi e yomarava nini, naga tasnena a kana kuruta sa ke ga ita. Sanene, pogos naña tamān si naga mare wo ita, ana kiena marena nene mēlula puryukawaena kienā ne pārin supe na māreraena na marena, nane Yermare. ¹⁵ Naga mēlula māreraena kienā ne Yermare, mluñpar plan kilika lala naña aþanaria kararkare ruru ita nenaga, sane maraunen marena naña temloge viowagania e kietā malena wetelu. ¹⁶ Lelaga nañpane, yumāena wo na iilaena kienā ne Yesu, pe kila re pa navisi nae ma e peni la poli, ana kila ke ga pan ita na yomarava nini. Visena la mokliu apisa visena sanini, asape

*“Naga sumā miila ruru ke lus kienā ne yermarua
Epraam lala.”* *Ais 41:8-9*

¹⁷ Nane sitomena kienā ne Ntewa sanene. Naga pisu sane Yesu monar imi sane ita wenla lala e sur make ga, vano-o kilia kilia ruru ita, kilia sinen ye ita. Ana tekilia towasinea, sa naña yoko naga masisun yumāena naña yoko naga kila va Ntewa komin kietā mlamulen viowa lala, naña kila kietā marawo temio Ntewa, sane pe kietā Parin Yar Wa. ¹⁸ Naga pisu pupia nakilalienna pimi mālivin kienā malena, mloge piowagan pano-o tauluia, ana kila naga kilia iila ruru ita sina e pogos naña nakilalienna imi mārera mēna ga van ita.

3

Yesu mon la metavan yermarua Mosis

¹ Wolai a vineu wa lala, naña amlogear navioena nae peni rui, nepisa pan amiu rui

nesape Yesu kilia iila ruru ita, ana nenagane nomāreran amiu, sineun nesape popon asitomyu manene naga va laa sane wa, sane naga pe nalologena a naga pe ūparin yar wa na kieta naleлагаena. ² Tevisu veve ruru li Yesu amio yermarua Mosis nanua. Yermarua Mosis nanua sumo, naga masisun kiena yumāena la papīsi e mratava māna ne Ntewa, a Yesu māna masisun yumāena la papīsi nařpa Ntewa pisirlua naga sape naga yumāenia. ³ La ga luwoka amasisun yumāena, ana Ntewa pisirlua Yesu pa manene la metavan Mosis, komin nařpa sane Mosis naga sike ga loyumā māna ne Ntewa, kila ke kana narin yumāena ne lala, ana pupia yumāena na visirluaen yumā nena, Yesu ga kila.

⁴ Yumā make ga, monar yar tai nařpa yumāenia, ana Yesu ke narui naga miyumāen yumā māna Ntewa, ana Ntewa naga pe ūparun yumāena nene. ⁵ Sanene, Mosis naga pe yar na yumāena, masisun ruru kiena yumāena make ga loyumā e mratava māna Ntewa, pano tol nařpa naga pe yar na visawalen pupia visen kiena ne Ntewa lala nařpa apisawal liluen ke pimi tol nanagane, ⁶ ana Kristo naga kila pa manene la sane, komin naga masisun visuaren pupia yumāena make ga na yumā nene, sane naga pe mēaru na pupia kana ūpar nena.

?A yumā nene na pisa ke ya ne, pona pisa ke ai? Sumā pisa ita ke ga ne, komin visae ve temarau re, a visae tekekaran kiena navisaaren lala, touarar ruru kieta nawasineena e la, ita teve kiena namratava wa ruru nena lala.

Yesu mon la metavan Mosis, a monar telelaga manene va la sane taulu la naña Mosis sumon la

⁷ Visena ta teke e Sirienna Wa, naña pe visena kienan ne Ninuna Wa na kilapege itaena, naña pisa sanini, sape

“Pane, visae aloge pulgon Ntewa,

⁸ *pe pon re si kiamiu sitomena la imi si mñarera poli, sa naña kiamiu yermarua la akila rui.*

Nanua sumo, e yomema, asike e pog na kilalien tai papisi, asumña pano-o asumñal ke sina ga akila ñarila.

⁹ *Ana Ntewa pisu la, pisa sanini, sape*

Nayalena kena la nene naña tol kas lualima yam vari ne, nesike nemio la silaga, apisu kiau naiilaena wo la pan la, ana ñelaga kien la nene na kilali in papisi.

¹⁰ *Kiela ñparmárerera kila sineu pikirara papisi, ana nepisu sane peraga, la nene na, silaga asumña apa e nene apa e nene amiyepe ke petan kiau mrapa mesmes lala.*

¹¹ *Sineu maren la ne sanene narui, sineu kar la papisi, ana nesumñalu narui, nepisaar pan la nesape purvanua wo navaruruena naña nekila ruru sumñate la nesape ve kiela, yoko ve ava re si loyumña ea.” Yauena 95:7-11*

¹² Wolai a vineu lala, komin sur ne la nanene, popon kam na avisuar ruru amiu. Pe pon re visae amiu yar tai, sitomen viowa sike e naga, pona sinena ve lelaga re si narui, kila naña naga werelua si naga vetan malena wo kienan ne Ntewa mali. ¹³ Pe sinetan re ita yar tai loru sanene poli, ana monar tela visena naiilaaren

van ita silaga e legiena punu ga, vena ve ita yar re tai naña ūelaga na mlamulen viowa la visa kotalia kare re naga vano-o naga manin nenaga. Visena naña meta ne sape “Pane, visae aloe pulgon Ntewa,” ana naga pe visena nasumo tai, ana sumal sumña ga, pulgona pio ke na wa, tesike e kana legiena na logearen la na wa.

¹⁴ Popon touurar kieta lelagaena mārerera ve sa nena ga naña temleлага ūesan ea, popon tesumal mārerera tesumña vano-o tol luasa. Ana visae tekila ve sanene, yoko temio Kristo, teve yar na war viraviranen naurarena wo lala kienan ne Ntewa.

¹⁵ Lelaga nañane-e, Visena Wa naña metava pisa sanene, sape pe pon re si sinemiu la im mārerera poli, sa naña yermarua lala akila e pogos na kilalienna lala e yomema, naña asumalu akawe visena kienan Mosis.

¹⁶ ?Ana la ne akila ūpar mārerera sanene, a la nene? La naña akila sanene, la naña akekaran amlogear ūesan pulgona Ntewa, ūpis narui appetanon kiela yar keviu yerkawa Mosis, naga sumon la apetan Isip. Naga sumon la amolue petan yo nene ana pe yam piavi re poli, akawe ke sina naga. ¹⁷ ?A la naña akilali Ntewa, amiyuyur sinena e kas lualima yam vari nene e kiela nayalorena, pano-o sinen kar manene la la, la ke nene na wa? Ee, la naña akila sanene, la ke ga nene na wa, naña naga tamalia la, ana siraunia akila luen ga mlamulena piowa e marana, pano naga kila amarmare ga, puryula la sutetai kar ga sike e yomema. ¹⁸ ?A la naña naga pisaar sape yoko la tapatete ava loyumña e kienan purvanua wo tanea navaruruena naña kila ruru sape ve

kiela, la ape yeririna la ne sanape? La naña tañatete ava ea, naga la naña akilakila ke ñarila, naña pe amlogear re sur ta poli. ¹⁹ ?A ya ne kila narui tañatete ava loyumña e yo wo na varuruena nene? Tañatete avavini vanon pe amlelaga re e Ntewa poli, a pe aphasine re naga poli.

4

Navaruruena wa kiena ne yeririna lala kiena ne Ntewa

¹ Nanua sumo, Ntewa kila ruru tanea yo na varuruena tai kiena ne kieta yermarua lala, ana nanagane mëna ga kila ruru si kieta yo wo na varuruen rui. Nasiiena tere nene naga mal ruru ga sike na wa, ana pe pon re teve sa yermarua la nene poli, naña akilalu kiela navaruruena nene, la moki naña pe apa re loyumña e poli. Peraga, popon ita tevisu ruru ita yo, pe pon re naña vano-o ñisi na ita lañasa, la mëna akilalu kiela pulmas, Ntewa visu veve ruru la sa ñisi ve ava atol re kiela navaruruena. ² Naga nene komin naña ita maran taaga ga sane yermarua la nene, naña lologena wo kiena ne Ntewa tol ita, sa naña tol la, ana akila sa naña amloge, ana pe amla re si lelagaena to metavan poli. Pe amla ruru re si kana visena la nene e kiela malena la poli, ñisi pe ñar re mras e la poli. ³ Ana e lepas kiena ne la nini naña pe amlelaga re sanene poli, Ntewa pis ñarera rui, pisa visena naña nesiri metava yam tai rui. Visena nene, pisape

“La nene akila sineu kar la pañisi,

*ana nepisaar nesape yoko la tañatete akilia atol
kiau navaruruena nene.” Yauena 95:11*

Ana ita naña temlelaga kemua e lelaga, navaruruena nene naga pe kieta naña teva loyumña ea.

Navaruruena kienan ne Ntewa nene, naga kila ruru pe kieta su nakonua rui, komin e pogos nasiiena, naga miyumæe pano-o tol kana legiena orai ana ñisi nena ga,⁴ ana sa naña Visena Wa pisa e yo lañasa, sape e kana legiena olua, naga pa ruru e kienan yumæena ne lala, pe miyumæen re si sur la nene poli.

⁵ Ana sur si tai, visena na metava pisayu naña Ntewa pisape yoko yar lañasa tañatete nena atol kienan navaruruena, ⁶ ana visena nene kila meraravan sape sane monar yar si lañas asike koyo tai naña yoko Ntewa tamän la ava loyumña. La nanua sumo, amloge lologena wo kienan ne Ntewa amio purvanua wo naña pisaar pisape ve kiela, ana pe asumal re märera poli, pe amlogear re poli, ana akila pal ruru nena ga, pe apa re loyumña e poli. ⁷ Ana kieta navaruruena sike na wa sike ne, a Ntewa pisaar kana legiena na tolona, komin kas mok ñaro rui, Parin Suñe Tepet pisawal visena la naña sike meta rui, naña pisa sanini sape

*“Nanagane visae aloge pulgona, pe pon re kiamiu
sitomena la imi märera si poli.” Yauena
95:7,8*

Popon tevisu kilale sane “nanagane” naña pisa e nini, nane kieta pogos ne nanini narui, naña Ntewa kila ruruia vena tetol natamaliaena.

⁸ Asitomyuli yermarua Yosua nanua. Naga

sumon kieta yermarua la kom̄psa apa loyum̄a e purvanua wo nāpa Ntewa pisaaria, ana visae naga ke narui navaruruena kiena ne Ntewa nāpa akus rui, yoko Ntewa tāpatete si visayu pogos tāpena tai va Tepet, visave pe legiena na vaen loyum̄a e kiena navaruruena.⁹ Ana peraga, naga sum̄a pisa ke pisape navaruruena wa nowo tai sike ga wa kiena ne kiena yeririna lala,¹⁰ ana visae a nāpa va loyum̄a ea, yoko wo nāpa wo vana vāpisi, yoko naga kilia va ruru e kiena yun̄aena make ga, sa ke ga nāpa Ntewa m̄ena pa ruru e kiena.

¹¹ Visae sanene, popon tom̄areran li nāpa tetol navaruruena wa nowo nene, ana pe pon re m̄ena ita yar tai ve logear re Ntewa, yoko kilapalia.

Visena kiena ne Ntewa po pāpisi

¹² Tesike vatanon visena kiena ne Ntewa, vanon kiena visena naga mali, miyum̄ae ke m̄arera pāpisi, kilia yur malena kien yaru, mal pāpisi taulu playu na mara nāpa mal lepas luwoka. Visena kiena ne Ntewa kilia va warpoyo va loyum̄a e losineta, kilia va līpere sur ya nāpa teke e kieta sitomena, pona visuveve ya nāpa teke e ninuta.¹³ Lelaga, naga nāpa yoko visuveve kieta malena, kilamarana tol make suria, tāpatete ita yar tai tapolounia.

Yesu pe kieta ñarin yaru wa

¹⁴ Ntewa kilia make sur la ne lepas na e ita, ana potena pania nāpa narina, pupia ñarin kieta yaru wa nāpa Yesu, naga mligan yo nini pa yalen silau ma e kiena yo ma metava e peni, pa kila

ruru si mara wo pan Ntewa vanon ita. Ana vanon naña kila ruru ita ke temio Ntewa sanene, popon touarar nalelagaena mñarera ea, a popon ve teligan li re si naga pogos tai. ¹⁵ Kieta ñarin yar wa nene, naga pe yar ta naña pe mninue re kieta ursuen la poli, ana kilia ruru po pañisi naña ita pe tesumal re mñarera poli. Naga sinen miye ita, yoko iila ita, komin nanua naga mñena ga, natañaliena lala apim ke e naga mñarera pañisi pania e lepas punu ga, sa ke ga naña apim ke e ita. Naga sa ga ita, ana sur ga tai, natañaliena pe ñere re nena naga mloru e mlamulena viowa poli. ¹⁶ Visae ve sanene, tepisu sane toñal kieta mrapa narui vena tekilali naña telen ita teva la lavis pun lele natotanoena wa kiena ne Ntewa, naña pe purþes nen lemamieno. Ve temarau re sina, tekekaran naña teim puna Ntewa, ana yoko tekilia tetol kiena sineyeena e kieta malena, yoko tevisu naña kiena nasinewoena iila ita e pog mñarera ya naña tesike ea.

5

Yesu pe ñarin yar wa na sineyeen yar lala

¹ La naña apuarar yumñaena na ñarin yar wa, apisiriplan la petan li wa tañena lala vena kilaen yumñaena na sanene narui. Yaru naña pe ñarin yaru wa, naga sumal su likan yeririna lala a Ntewa, vena waren kiela nalaena lala amio nakupaññaena lala vania, vena naga kilia viewo kiela mlamulena viowa lala. ² Ñarin yaru wa nene pisu kilale ruru naña yar la asumña amiyumñae piowa ga, asumña amiyepo ga petan

mrapa, komin naña naga mëna pe kumpui ga, naga mëna kilia malum, kila sane sinena kilia ye ruru nena yeririna tañena lala, naga momäau ruru nena pan la.³ Naga sa ga yeririna tañena lala, ana pogos naña kila nakupañaena lala, monar kila ve vanon re ga mlamulena kiena ne yeririna lala, ana vanon mëna kiena mlamulena viowa lala.⁴ Komin sur ne nanene, pe pon re yar tai ligunar si naga poli visave popon imi ve ñarin yaru wa, ana Ntewa ga kilia ligunar yaru vena war pupia kia na sanene, sa naña naga mliganar yermarua Eron nanua sumo pe kiesta ñarin yaru wa ñesa.

⁵ A e lepas kiena Kristo, sa ke mëna nene. Naga pe kiesta pupia ñarin yaru wa, ana naga pe pisirlua re naga pa metava sape naga sanene poli, ana Ntewa ga pisirlua naga. Visena kiena ne Ntewa naña pisa sanene sike e nasirienwa na sumo lala, naña ta pisa sanini, sape

*“Ko na nepisu sane ñane opim ope naruu nenaga,
a in na nepim nepe arimomäa kemua lelaga.”*

Yauena 2:7

⁶ Tañena, pisa sanini, sape

*“In na nemligan ko sane yermarua Malkusteké,
ko na yaru wa maro e kiena lus, naña yoko
ouarar mäa yumäena nene vano-o ve uro re.”*

Yauena 110:4

⁷ Ntewa mligan yumäena nene pa Yesu, ana tepisu e pogos na kiena malena e yomarava nini, naga kila ke pa rui. Sila ga naga sitom manene yomarava nini pañisi, ana tagin pa

Ntewa, wamarana mlau vanonia. Naga sumalar m̄arera sike e Ntewa sape visae kienā malena kovio, yoko Ntewa kila malia sina, ana naga m̄areran la sane naña mlenwo itania.

Ana Ntewa pisu ūelaga wo na mom̄auena a navatanoena kienā ne Yesu, ana sinena myea, mloge kienā naviunena lala.⁸ Lelaga naña Yesu naga pe narina ne Ntewa rui, ana Ntewa tamān naloge viowaena na pogos m̄arera lala pimi pania, sape vian Yesu vena tol ruru ūelaga na logearena e kienā malena.⁹⁻¹⁰ Naga patanon make nasinenanena lala kienā ne arimana, pano-o kila make yum̄aena la naña Ntewa mla pania, kila narui pisirlua naga sane yermarua Malkusteke. Sanene, Yesu pimi pe Ntewa kienā ūarin yaru wa, pim pe purp̄es nen malena naña ve uro re kieta ita punu ga naña temlogearia.

Popon teimi temarua ruru wo e Kristo

¹¹ Ana kia naña Malkusteke, kienā sunienā marua wo la sike ne, naña akilia akila meraravan ruru van amiu sanape e yar nene amio kienā yum̄aena. Mareran navisayu ruruen merarava van amiu, komin naña yam tai sa naña kiligamiu poñe tote la sane. Ana visae kam na asitom asape aloge kilalelia,¹² yoko wo vap̄isi, komin naña kam na amleлага nakonua rui, ana atorokin naña aim ave navianena na visena wa kienā ne Ntewa rui. Ana peraga, asum̄a ga sa ga nene, ana monar avian amiu si ea, siar si e kana purp̄es nen visena ne lala.

! Lelaga naña, kam na nakanen kinanen mārera la rui, ana sa ga naña asumña sinemiun ke amun yu na wa! ¹³ La naña amun ke yu sanene wa ape sisi ke ga wa, ana tañatete ave manmarua e visena na mrapa lelaga, ¹⁴ ana la naña akan ke kinanen mārera, la amarua ruru rui. La ne sanene, kiela sitomena la miyumae ruru pano-o apisu veve ruru make sur punu ga, ana akapur apimi po tol naña apisu kilale ruru sur ya naña po a sur ya naña piowa.

6

Popon tevisuar ita ve towasuñe re si teva varau

¹ Komin sitomena la nene, popon teligan ūlaga na sisi sike na, teva re laa sane wa e navianena mārera kiena ne Kristo na atorokin sitomena naña marua.

Tepilopu ita e kieta yumñaena piowa namarena la rui, tetol naviawaena e Ntewa rui, ana popon ve tesumña teva re si ea. Naga sa naña tekilavan lelen yumña rui, pe pogos na visirluaen narui. ² Apian ita e nakeena rui, apu þarita rui, temlelaga rui tesape yoko tesumñal si e marena, a tekilia rui nalipereena ta sike ne amio kana nakoaena nena naña yar viowa la akus vano-o tañatete þisi pogos tai. Sur la nene toparo make e rui, ana pe pon re tesumña teteteliv māga e sur la nene silaga poli, ana popon tesumña teva re laa sane temio kieta Suñe. ³ Sur nene mārera papisi, ana visae Ntewa tamān ga van ita, yoko tekilia teyumñaen wo ga. ⁴ Lelaga, yoko tekilali naña teva

re laa ga wa temio naga silaga, ana sanapen la naña amloru, apa si varau rui?

La nene, la amial ruru ūpes e yomerarava asumña akinan ke e lokove nae ma e peni rui, a Ninuna Wa pimi mēna e la, a pogos naña apa si apiowa sanene, yoko tañatete si avilopu la awasuñe aim e malena. ⁵ Visena Wa kienan ne Ntewa miila la e kiela malena rui, a atol towe mā namāreraena na suñenena naña pimi ke ne, ⁶ ana pogos naña apilopu si māsila, akila ñarila sanene, yoko aim awo si sanape? Peraga, yoko viowa van la vañisi, komin naña akila ke sane asuar ke si Narina ne Ntewa meta e lak torovia, sa naña asumña apisirilua ke naga e maran yar lala vena aviuelin kare si kienan kia.

⁷ Asitomyuli na nene. Porotano naña mun yua naña mloloru ea, ana ñar manene kinanen kan la naña amiyumāe ke ea, ana Ntewa kekaran pañisi, kienan navisa ruruena sike ea. ⁸ Ana porotano naña pe ñar re sur wo poli, ñar ga vilumāni viowa lala, naga sa ga naña apiain ga maren pania, ana tañatete akila sur wo ta ea, yoko asikap ga narui.

⁹ Erau lala lelaga pañisi, visena la ne sanene amārera pañisi, ana e lepas na pun amiu, in na pe nesitom re nesape kam na sanene poli. Peraga, noñasine amiu, sane mras nen malena viu naña po kapuru ke e amiu na wa. ¹⁰ In na nemlelaga nesape yoko tañatete Ntewa sinen ūpesan kiamiu yumāena wo lala, a yoko tañatete sitom korenan vinayaena a sineyeena naña kam na akila pania, pogos naña kam na amiila kienan nalelagaena wa tañena lala. Kam na amiyumāe

po sanene, ana kila Ntewa kekaran pap̄isi, yoko naga m̄ena kila ruruia a kila wo van amiu.

¹¹ Sanene, nesape neiilaar amiu sina, vena ve ava re si varau, kam na am̄areran ava re laa ga wa, ava m̄aga atol ga luas rui, vena akilia atol sur punu ga naña kiamicu sitomena sike ea. ¹² Kam na ve ave yowen re, ve yepemiu malum re, ana monar avesinaia e yum̄aena maran ve taaga sa ke kieta yermarua wo la naña amasusun ruru yum̄aena, kiela sitomena la piayavi pano-o atol sur punu ga la naña Ntewa pisaar p̄esan pan la.

Visaarena kiena ne Ntewa pe lelaga pap̄isi

¹³ Navisaarena ta naña Ntewa kila, naga kila pa yermarua Epraam, pisaar m̄arera pania e lepas na lus la naña yoko amolue raunia. Pe kia tap̄ena re si naña Ntewa kilia visa vena kila kiena navisaarena nene m̄arera poli, komin kienakia naga mon metavan make kia tap̄ena lala, ana Ntewa pisaar ke sina e ga e kienakia, sape

¹⁴ “*In na Ntewa, yoko nevisa ruru ko ve keviu vap̄isi, nekila kiom̄a lus la aim ave moki vap̄isi e yomarava nini.*”

¹⁵ Ana Epraam lavisi sitom p̄ele visena nene, ana pisu naña Ntewa kila kienavisaarena nene m̄arera ruru po pap̄isi, ana pe sur koren ga naña Epraam tol pogos m̄arera la mok pap̄isi, ana pe mligan re navisaarena nene poli, p̄uarar ruru m̄a pano-o pisu naña siar tol ya naña Ntewa pisaar pania.

¹⁶ E lepas na p̄elaga nakilaen navisaarena m̄arera, yar la asum̄a apisa kia kienayar wa tai ponasur wa tai. Ana pogos naña yar tap̄ena

la aloe, la monar alelaga ea, tāpatete si avisin sinekar vania, komin kia nāpa apisa kila visena m̄arera.

¹⁷ Ana sanapen Ntewa? Naga m̄ena sinenan sape kila kienā visena van ita m̄arera ruruia, vena telelaga ea, ve tesitom ūle re. Ita na sane narina lala na waren kienā lalimana, ana naga sinenan sape tekiliaar ruru tesape kienā sitomena wo nāpa teke e ita tāpatete ūsi pogos tai, ana kila kienā navisaarena pan ita m̄arera pap̄isi.

¹⁸ Navisaarena kienā ne Ntewa nāpa pan ita m̄arera ruru sanene rui, komin naga pe pisokan li re poglis tai poli wa, kienā visena tāpatete vilovilopu karea, ana metavan kienā navisaaren nene, pisa si amio kienā kia wa, vena kilaen kienā visena nene m̄arera nenaga. Ana sur lua nene, kienā navisaarena amio kienā kia, lalua amiyum̄ae lele taaga vena kila ita tesum̄al m̄arera tese kienā visena. Ita topur matan yo viowa nāpa tesu ūpes ea, takalewele ke yo na suvanena, ana navisaarena lala kienā ne Ntewa akila kieta sitomena la piayavi ruru po. Sanene yoko tekilia teva tetol ruru yo wo nāpa Ntewa kila ruruia a mligan sike e marata woga ga nāpa.

¹⁹ Kieta nalelagaena m̄arera nene, nāpa tesape yoko Yesu tamalia ita, naga sitomen ta nāpa sane kilavaru na tararen waa. Yoko uuarar ruru kieta malena, vena ve sur re si ta nāpa kilia werelua ita, vano-o tol pogos nāpa teva varaun pupia kulmrae loyum̄a e Yo Wa nāpa pe Yo Wa pap̄isi. E yo nene teva tesum̄al nena tese marana ne

Ntewa, yoko kieta sitomena lala akilia amarera ruru ke na wa asape woga ga van ita.

²⁰ Naga nene komin naña Yesu sumon ita pa e yo wa nene rui, pa kila kiena yumaena sane kieta ñarin yar wa, vena kila kieta mara wo temio Ntewa.

Sa naña tepisa rui, naga sane pe ñarin yar wa maro na lus kiena ne yermarua yaru wa Malkustek, ana naga pul plan kieta mlamulen viowa la rui, a yoko kila mā kiena yumaena na sanene vanon ita vano-o tañatete ñisi pogos tai.

7

Malkustek na sumo naga mon la metavan make ñarin yar wa tañena lala

¹ ?Ana yermarua Malkustek nene, naga ai, a kana sunieno naga pa sanape? Tus naña Nasiarena pisayuia, pisape naga pe yar na pogos kiena ne Epraam nanua sumo, pe ñarin supe na kumali marua wa naña Salem, a naga pe pupia yar wa kiena ne Ntewa na mava. Ana pogos tai, yermarua Epraam pa kila mara pa kiena nasinekar lala, naña ñarin supe tañena lala, ana taulu la, ñasupe ke si narui, pitawe Malkustek kinae patanonia, ana Malkustek pisa ruruia. ² Ana Epraam mla nalaena pania, mlalua lualima petan ponotia na sur make la naña taulu e pogos na mara naña ñarar ke sape wasupe si va māna. Pupia yar wa nene naga pe yar tai, sa naña kiena kia ga luwoka apisa. Kiena kia ñes nena, Malkustek, kana kinasa pisape “Parin supe na mesmesu,” a kiena kia na lua

pisa sanini, sape “Parin suþe na sumñare,” komin naga pe þarin suþe nae pulkumali naþa Salem, naþa kana kinasnena na sumñare.³ Ýar nene, kana sunienanena pe taþena ga, komin naþa pe temloge re apisape kiena yermarua lalua na sanape, pona amña repina lala la ape lus nae pe wa. La pe apisawal re kiena malienapoli asape amña siar sanape, a pe sunienanena kiena marena re poli. !Sa naþa naga pe mare re nena poli, sumña þuarar ke kiena yumñaena na wa! Sanene, naga sa ga narina ga Ntewa narui, naþa yoko naga ve kiesta yar wa mä vano-o taþatete þisi pog tai.⁴ Komin sur la nene, tepisu e visena marua kiena ne Ntewa naþa kia na Malkustek, naga pe kia tai naþa pa metava paþisi, pano-o tol repita yermarua Epraam, naþa asitom ke asape naga mon la metava rui, naga mñena patanonia, þar nawarena pania e komþas nen sur la naþa taulu e mara.

⁵ Ana þelaga na laen nawarena na sanene, naga þelaga ta naþa navisaluaena pisape le Israel lala la monar akila luen ga. Kiela yar wa lala na lus kiena ne Livae, la monar avisuar ruru la, awarplan lualima petan ponotia e kiela sur make ga van la, komin la na sa ga namratava taaga, naþa ape lus kiena ne Epraam.⁶ Ana Malkustek nene, naga pe nae re mratava puna ne yermarua Epraam poli, ana Epraam pisu kilalea sape naga yaru wa tai, mlipere nawarena komþas pania. Yermarua Epraam nena naþa Ntewa pisaar sur wo la pania, ana naga patanon Malkustek.

Ana pogos naþa Malkustek tol nalaena nene, kekara, pisa ruru Epraam, a nanene kila mer-

aravan si pan ita sane naga mon manene la metavania,⁷ komin yar naña torokin visa ruru yar tañena, naga monar mon laa metavan yar nene.⁸ Ana Malkustek amio yar wa tañena la nene, la make ga atol kiela nalaen la torok ga, ana la ape tañenan sur tai. Suri nene sanene, sape yaru wa lala aþar kiela, ana siraunia amarmare, ana Malkustek mla kien, asape naga sumña pano-o pe mare re poli.⁹ Ana sanaña Malkustek mon la metavan yermarua Epraam, naga mon mëna metavan pupia kia tañena naña Livae. Lelaga kemua, Livae naga ñesan naña pe repina ne lus kien ne yaru wa lala, ana naga mëna ga molue kome lus kien ne Epraam, ana pogos naña Epraam patanon Malkustek, mla nalaena pania, sa ga naña Livae mëna patanon Malkustek mla nalaena pania.¹⁰ Suri nene naga sane pogos naña Epraam mälivin Malkustek, kila pania, Livae pe paeme re e repina nene poli wa, ana sa ga naña naga mëna kila.

*Yesu pe molue re e lus kien ne yaru wa la poli,
ana molue ga kome lus viu tai*

¹¹ Ana visena la ne ma metava apisawal ke pupia sur ta ne pañisi. Akila meraravan asape Ntewa ñere plan lus na yaru wa lala kien ne Livae, pisirilua lus tañena tai kien ne yar wa lala, kus lelena. Yermarua Eron mëna pisirilua yumñaena na lus kien ne yar wa lala, ana Mosis ñpar kien navisaluaena nene pimi mäliv, ana visae Ntewa visu sane sur lua nene torokin kila ita temesmes ruru nena temio, vera na ligan sumña ga. Ana peraga, naga pilopuia, mligan si

þarin yar wa viu tai pimi mälivin ita, naþa pe lus kienā ne yermarua taþena nene Malkustekē.
12 Ana komin Ntewa pisirilua þarin yar wa viu nene, mesmesun mēna naþa visirlua kana navisaluaena viu tai. **13** Monar ve sanene, komin e nene naga pisayu kieta Suþe, naþa naga mälivi e lus ta naþa pe la re nena ta sumñal se wonta ana kila yumñaena kienā ne yar wa poli. **14** Lus naþa Yesu mälivi ea, tekilia tesape naga lus nae Suta, ana pogos naþa Mosis pisawal kia kienā ne lus kienā ne yar wa lala, naga pe pisawal re nena kia naþa Suta poli.

15 Ana lus na yar wa taþena lala sumña ga, naþa Yesu molue komea, nane lus kienā ne Malkustekē naþa tepisasa ke narui. Sur ne nane kila narui tepisu sane Yesu pe sa re yar wa taþena la poli, ana naga sa nena Malkustekē ne narui. **16** Taþena la nene, apim ape yar wa komin ga naþa sane ape kana lus na kuruta mal nene, sa naþa navisaluaena marua pisa, ana Yesu pimi pe kieta þarin yar wa e pupia namñareraena na kienā maleña naþa taþatete akila karea, naþa sike sike lue narui. **17** Tekilia tesape naga su lue sanene, komin naþa visena kienā ne Ntewa pisa rui, naþa sape

“In na nemligan ko sane yermarua Malkustekē, ko ope yar wa maro na kienā lusa, naþa yoko ouarar yumñaena vano-o taþatete þisi pogos tai.”

Yauena 110:4

18 E nene, pimi merarava ruru pan ita sane Ntewa pilopu kienā mrapa na yumñaena. Mrapa marua naga navisaluaena kienā Mosis na sumo, naþa sumñal sukaþar papisi, ana sa naþa kienā

namāreraena naga pe torokin re kila sur wo ta van ita poli. ¹⁹ Naga kila ūpele yon naña kila mesmesun ruru ita, ana Ntewa mligan mrapa marua nena sike ga narui, kila si sitomen viu ta pa metava, kus lelena. Mrapa viu nane tekilia telelaga mārera tesape naga pe mrapa namalena naña pe lelaga, naña kilia sumon ita teim lavisin Ntewa.

²⁰ Ana mrapa viu nena, navisaarena kiena ne Ntewa tai kilarar sumālar mārera su lue na sike ne. Yar wa tapēna na sumo lala, poglis naña apuarar pārila, amiyawawo la vanon kielā yumāena, pe navisaarena re tai sanene poli. ²¹ Ana pogos naña Ntewa pisirlua Yesu pimi pe kieta pārin yar wa, kila amio kiena navisaarena mārera tai. Naga sa naña visena tai na Tus na Yauena Wa Lala pisa, naña sape

*“Ntewa pisaar mārera rui, ana tapātete si vilopu
kiena visena nene, visave”*

*‘Ko na yoko ourar yumāena sa naña pārin
yar wa kiena ne kiau yeririna lala, vano-o
tapātete ōpisin pogos tai.’” Yauena 110:4*

²² Ana Yesu ūpuarar ruru kiena yumāena nena sanene, pe kile na naviranarena viu kiena ne Ntewa amio ita, naña po manene la taulu na sumo, a pe nasiaren suri la naña Ntewa pisaaria pan ita, yoko kila make ruru nena van ita sirau.

²³ Nanua sumo na yar wa la moki, komin naña ta miyumāe pano-o kovio, tapēna kus lelena, miyumāe mā pano-o, naga mēna kovio, la akilakila sanene. La tapātete asu lue, ²⁴ ana Yesu, naga yoko su lue ga narui, ana yoko naga taaga ga uarar kiena yumāena sa naña kieta pārin

yaru wa vano-o taþatete ðisi pog tai. ²⁵ Sanene, naga sike ga e marana ne Ntewa silaga, mlen lue ga pania vanon ita, ana kila sane ita nanagane, pona ita la naþa tepim ke rau wa, ana naga ke narui naþa yoko tamalia make ruru ita punu ga naþa teva tokom puna teim lavisin Ntewa.

Yesu na pe þarin yaru wa nena napo

²⁶ Tekekara papisi naþa Ntewa pisu sane popon ligan þarin yaru wa ta naþa po manene sanene imin ita. Naga pe yar ta naþa pe yaru wa papisi, pe napiowaena ta to re nena ea ðisa, merarava papisi, kiena þelaga pe sa re nena yar na kilaen mlamulen viowa la poli, kiena kia pa manene laa to metavan punu ga sur nae peni. ²⁷ Yar wa taþena la nene, la monar akila luen ga kuþapaena na ikikena legiena punu ga. Sumo, monar akila vanon si kiela mlamulena viowa lala, a siraunia, akilia akila vanon mlamulena viowa kiena ne yeririna taþena lala, ana Yesu na pe sa re nene poli. Naga kila kuþapaena na ikikinen mlamulena viowa na yomarava wetelu yam taaga, nanene e pogos naþa kuþapain si tasnena vanon ita.

²⁸ Lelaga kemua naþa navisaluaena marua pimi sumo, ana kiena þarin yar wa pe yar ga, malum ga, ana naviranarena viu naþa pimi marea, kiena þarin yar wa naga mesmes lue ga, nane Yesu narina ne Ntewa.

8

*Naviranarena viu: yumñaena kiena ne kiena
þarin yar wa naga po manene la*

¹ Ana vianen la naña meta ne apisa sur mok liu e lepas na ñarin yaru wa lala. Ana pupia purþes nen visena tai sumña ga, naña popon tesitom urmi ea, naña pisa sape kiesta ñarin yaru wa wo tanea ta sike rui. Naga Yesu, naña ñasuþe si pa ma e peni, ana Yerkawa Keviu na Yo na Ma Metava mligan naga totano teke e lepas nena na ñamarua. ² Naga sike e yo nene, kila ke kiena yumñaena wa lala, sa naña yaru wa la nanua sumo akila lotena e yumña kanus wa naña e yo mema. Ana lelen kilaen lotena nene, yar ga la amiyumñaenia, ana kiesta ñarin yaru wa Yesu naga miyumñae ke loyumña e yo na lotena naña po, pe lelaga ruruia, naña Ntewa ga miyumñaenia. ³ A ñarin yaru wa taþena la nene, kielo yumñaena, silaga apisir plan la vena waren nalaena va Ntewa, a akila kuþapäena la pania, ana popon teviun tevisave kiesta ñarin yaru wa nene, pona naga mëna mla nalaena pa Ntewa, a kila kuþapäena pania? ⁴ Visae e ga e yomarava nini, yoko taþatete avisu naga sane yaru wa tai, komin naga pe molue re kome lus kiena ne Livae poli, naña navisaluaena pisalua pan la sape lala ga akilia awar nalaena va Ntewa. Sanene, kiesta ñarin yaru wa nene sumña miyumñae ke ga e yo wa na ma e peni.

⁵ Yo wa na yomarava nini, amio yumñaena la naña akila ea, naga sa ga kana yanen ga, ana naga naña ma e peni, naga napo nena ga lelaga. Ntewa mëna pisa sa ke ga, pisa kilale pa Mosis, ve sanape naña yoko yumñaen yumña kanus wa, pisape yoko yumñaen taveve kana nono nena

torokin naña naga pisuia poglis naña pa ma e tavie. ⁶ Ana sanene tepisu naña Yesu kieta parin yaru wa pe lelaga napo, a kiena yumñaena punuga powo la sane. Naga totano likan ita temio Ntewa, miyumñaen naviranarena viu tai van ita temio naga po manene la sane, naña sike e navisaarena lala kiena ne Ntewa naña po laa sane, pano-o tepisu naña sike ma e yo wa na peni kila yumñaena po manene laa sane. ⁷ Visae naviranarena ñes nene naga woga ga rui, vera na tañatete si nalua nena, ana peraga, kila narui nanagane Ntewa pisirlua naviranarena viu amio ita naña po manene rui.

Naviranarena viu: Ntewa pisaar nanua rui

⁸ Naviranarena naña na sumo, Ntewa pisu sane pe miyumñae po re poli, pe torokin re kiena sitomen poli wa, ana kila naga pisaar sina na urviu tai. Naga pisawal sanene e visena ta naña mla pa Navisawalena Seremæa vena visawalia. E visena nena, Ntewa pisaar sanini, sape

“Ayagogo ruruia. Sineun nesape nevisa van amiu nevisave pogos ta pimi ke ne, naña yoko nekila naviranarena viu tai nemio amiu kiau yeririna lala, kam na lus kiena ne Suta amio lus nae Israel.

⁹ Yoko naviranarena nena ve maran taaga re amio naña nekila nemio kiamiu yermarua la nanua sumo ne. Naviranarena na urmarua nene, naga e pogos naña sineu mie la, noñere plan la e pogos mñarera gar Isip, ana siraunia, pe asitomäl re si naviranarena

*nene poli, pe amlogear re si poli, kila narui
in m̄ena nepilopu m̄asuu pan la.*

10 *Ana nanagane, yoko nevisirilua si naviranarena
viu tai nemio si kiamiu lus lala. E navi-
ranarena nene, yoko nekila sanini:*

*Yoko neligan ruru kiau navisaluaena lala sike e
kiela sitomena lala, yoko nesiri kiau visena
la sike e losinela lala, yoko neim neve kiela
Ntewa kemua lelaga, a yoko aim ave kiau
p̄egas nen yeririna.*

11 *E pogos nene, tāpatete si akilali nāpa avian
la, sane tā kilali nāpa pisawal van nalavis
puna, visave ‘Ke, mr̄apa nanene,’ pona tā
pisawal va wenla, visave ‘Ntewa, naga
sanene sanene.’*

*Peraga, yoko tāpatete si akila ve sanene, komin
yoko la punu ga veve taaga avisu kilale inu
e kiela malena, siar e la nāpa pe kiela kia
re poli, vano-o tol kiela yerkawa ne lala.*

12 *Nepisaar nesape kiela napiowaena lala, yoko
neviewo nena ga, a kiela mlamulen viowa
lala, yoko ve nesitomāl re si na rui.*

*Nane kiau naviranarena viu ne nanene narui
nemio kiau yeririna lala.”* **Ser 31:31-34**

13 *Ana e kieno visena nene, Ntewa pisayu
naviranarena viu nene, kila ita tepisu kilale sane
naga pisu ke kieno naviranarena na sumo nene
sane pe urmarua rui. A sitomena ta sumā ga
sane sur nāpa Ntewa pisa ne sape pe urmarua
rui, nagane pito la tano narui, ve ve viavi re yoko
kovio make nenaga.*

9

Naviranarena viu: kiena lele na lotuena naga po manene la

¹ Ana tekilia ruru po naña sane naviranarena marua, naga kana mrapa lala na kilaen lotena asumā ga, amio mēna kiena lele na kilaen lotena tai, naña sike ga yomarava nini. ² Lele na kilaen lotena nene, naga kana yumā kanus wa nena, naña aþere pupia kulmrae ea, akila þerea sane loyumā lua. Lepas tai, naña apio asape Yo Wa, purþes nen kapi vivaga tai naña kana koruas olua sike ea, amio varvara tai na kilaparavi lualima yam taaga pa lua, naña apio kilaparavi na vianen van Ntewa.

³ A varau kulmrae nene, lepas þas na vano, naga apio asape Yo Wa naña pe Yo Wa paþisi.

⁴ Loyumā e yo nena, naga kana wonta na ponotaninu nena naña amiyumāen e kol, amio pias nen navisaluaena. Pias nene amiyumāen kana kulusa e kol, yepas na loyumā a vanua, naña e kana loyumā nena, amligan ruru sur telu sike ea. Nasumo, naga pialora naña pe kol, naña kinakinasnkinanena na yo mema naña asape māna teke ea, a sur na lua, naga plasgai kiena ne yermarua Aron naña nanua na pitovi, a sur na maro, naga kilavaru lua naña pe lepalepasa naña Ntewa siri kiena navisaluaena sike e la.

⁵ A e wos nen pias nen navisaluaena nene, naga pe keplamarana, naña asape lele na totanoena na sineyeena kiena ne Ntewa. A nono lua na navisi asumāl asike meta ea, naña akian kupela suvivi yo naña naurarena kiena ne Ntewa pitom

ke tano ea. Ana yo wa na lotena naviranarena marua naga kana sur ne la powo pañisi, ana tañatete si tevisa sur ve moki e lepasnela. Ana sur na visaena taaga, tesape yo na lotena nena, amio kana sur ne lala, naga amiyumñaen ga e sur na yomarava la nini, tañatete nena sike sike lue, naga pe po re sane yo na lotena na naviranarena viu poli.

Naviranarena viu: kana nakupañpaena nena naga po manene la

⁶ Sur la ne sike meta ne, nane sur ke la nene narui naña amligan ruru sike loyumña e yumña kanus wa na sumo nanua ne, ana poglis naña yar wa la apa loyumña, amiyumñae amio la. Ana silaga, apava ke e ga e yo wa naña mon ñesa, ⁷ ana e yo wa na lua naña pe yo wa manenea, yar wa lala pe apa li re nena loyumña e poli. Yo nene yar taaga kilia va loyumña ea, nane kiela ñarin yar wa, a naga pe pa re silaga poli, kilia va ea yam ve taaga ga e kasa. A visae pogos naña vavini, tañatete va koren ga sanene, ana monar taveve kana mrapa ne lala.

Sumon naña vavini, monar kila kuñpañaena e sur mal tai, ana monar war piasnen kana kuruta nena va loyumña sane nalaena tai, nanene na e lepas nen kiena mlamulen viowa amio kiena ne yeririna lala. ⁸ Ana pogos naña akila ke sanene, naga sane pe kile na Ninuna Wa naña kila meraravan pan ita sape pog naña visae yumña kanus nene susu mña ke ga wa, vera na ita yar kar la pe kieta mrapa re nena ta poli naña teva toworu e yo naña Ntewa sike ea.

⁹ Kanus na yumña wa nañani, amio kana kulmrae nena naña telan liþere loyumña, a kana sur ne lala, la na ape sur na konua na ña rui, ana apisa ke pupia sur ta ne pan ita na nagane ne. Akila narui tesumña tepisu kilale tesape nalaena la naña yaru wa lala amlavia pan Ntewa, amio kuþapäna la naña akila ke ne, akila poga ga, ana sur la nene tapatete kilia kila yeririna la aloe sane kiela sitomena la mekiki ruru nenaga e navisuena kienan ne Ntewa.

¹⁰ Akila sur la nene, amio ya la naña narin navisaluaena la apisa, naga nene e lepas na mrapa na yumñaenen kinanena amio namunena, a e þelaga na kevanen sur lala. Ana sur la nene ape na yepas nen yar ga na vanua, ana pe atol re losinena pona kienan sitomena poli. Kieta yermarua la apuarar mä þelaga marua na sanene pano-o, ana sur la nene na ve nauarar laen ga vano-o tol pogos naña Ntewa kila kieta mrapa viu, naña kana naviranarena viu nena naña pimi mäliv rui.

Tana ne Kristo kevan ita mekiki rui

¹¹ Ana pogos naña Kristo pimi mälivi, naga pimi sane kieta þarin yaru wa, naña pe na þelaga marua re poli, ana pe na mrapa viu, vena kila narui tekilia tetol navisaruruena wa la naña Ntewa mligan ruru sike na. Naga pe pa miyumña re e yumña wa kanus marua na sumo poli, miyumña e ta naña po manene la paþisi, pa la metavan nene. Yo wa naña kila ke yumñaena ea, pe yar re miyumñaen e limana po, a pe su re mäna e yomarava nini poli, sike

nena e yo merarava e marana ne Ntewa nae peni. ¹² Ana pogos naña Kristo pa loyumña e yo wa nene, naga pano pano-o tol nena kana yo wa naña pe yo wa nena napo, ana pa yam taaga ga, pe navaen re si pogos tañena poli. A pogos naña pa loyumña, kuruta naña naga ñaria pe pe kuruta na nane re poli pona kuruta na narin puluk, ana kana kuruta nena napo naña mlau e lak torovia. Ana kurutana sike e marana ne Ntewa sanene, taulu naul luaen kieta mlamulen viowa la, naña tañatete ñis pog tai. ¹³ Monar ve sanene, komin naña e ñelaga marua, visae yar tai kila sur ta viowa, amla narin kuruta na nane pona puluk, amio posnoyavi na narin puluk naña askapia, amla pa e yo wa. Ana e pogos nene asitom asape nalaena na sanene kilia kila yar nene ikiki si e marana ne Ntewa. ¹⁴ Ana visae kuruta na sur mal ga la akila sanene, yoko kuruta kana Kristo naga kilia kila va ve keviu laa sane. Kristo pe yaru wa tai, naga mekiki ruru nena ga, pe kororaki ta to re e poli, ana naga tamän kienan malena vena Ninuna Wa la va Ntewa sane nalaena tai, ana naga pim pe kieta natamaliaena. Sanene, yoko kuruta kana Kristo kilia kila sineta la ikiki, kilia wereplan ita vetan kieta yumñaena na marena lala, pisir plan ita vena tekila yumñaena lala kienan ne Ntewa mali.

Tana ne Kristo kila naviranarena viu sumalu märera

¹⁵ Ana komin naña Yesu kila yumñaena wo pan ita sanene, tekilia tevisu naga, sane naga pe yar na waren sur wo lala na viranarena viu imi mälivi e ita. Nanene naga miyumñaen

e kiena marena, naña sane marena ta naña pul plan make maliena kiena ne yeririna lala naña akilaro navisaluaena lala na viranarena nasumo. Ana komin naña naga pul plan ita sanene, kila sane visae ita a naña Ntewa vio ita, tekilia tetol kieta lalimana naña yoko tañatete ñis pogos tai. ¹⁶ Visae Yesu ve mare re, tañatete tetol kiena lalimana la nene, ana sa naña sane mare kemua lelaga, navisaarena make ga naña na viranarena nena apim sane visena maro kiena Yesu, ana sur make ga pimi e limata. ¹⁷ Komin naña visae yar tai visaar maron sur tai sa naña kiena visena maro, ana pogos naña naga mal ke ga wa, apuarar ruru kiena visaarena nene sumña ga, ana pe amiyumñaen re poli sumña pano-o tol pogos naña visae naga mare narui, yoko ayumñaen ga na wa. ¹⁸ Sa ke mëna naviranarena naña Ntewa kila ñesania, naña visae kuruta na kuñapäena lau, ana visena naviranarena sumñalu.

¹⁹ Sur nene Mosis mëna kila, naña Ntewa kian kiena navisaluaena la pania ma e tavia, ana pitomi tano pisawal make kana visena ne lala pa yeririna lala, ana pogos naña pisawal make pae, mëmemor nakuñapäena ne lala, vena kila sa naña visena navisaluaena nena amali, a asumñalu. Amë momar narin puluk lala a nane la nañani ana naga mla kala narin kuruta ne lala, taron narin wii pito amio, ana mla narin laki tai, apio asape isop, piar vilus nen sipsip naña pivaga pa ea, ana puton pito e kuruta nañani, peven ve tokak ga e tus navisaluaena nena, a peven mëna

e yeririna lala, pisawal pan la, sape

²⁰ “Naga nene kuruta na sur mare naña vena kilaen navisaluaena kiena ne Ntewa mali. Ana monar tevatanonia a telogearia.”

²¹ A sa naña peven kuruta nene e la, ana peven mëna ve torokaki e yumña tapolen nene, amio sur la naña asike loyumña ea, naña asumña akila ke kiela lotena amio la.

²² Mrapa na yumñaena la naña na navisaluaena marua nene la sa ke nene narui, naña lavis sur make ga naña amiyumñae ke amio la, monar aveeven kuruta ea vena akila aim ave sur wa silaga. Naga nene sane kila meraravan pupia sur ta ne pañisi van ita, sane visae kuruta ve lau re, mlamulen viowa tañatete aviewoia.

*Naviranarena viu: kana kupaññaena ñpar plan
make ga mlamulena viowa lala na yomerava*

²³ Sanene, sur la naña li wa la amiyumñae ke ea, monar akila mekik lue ga taveve kana narin ñelaga ne lala. Ana yumña wa kanus nena, amio kana sur ne lala, la ape sur na yomarava ga nini, ana sanapen yo wa naña na lelaga, naña nane Ntewa teke ea ma e peni? ?Naga mëna monar kana kupaññaena na viewoen tai? Ee sanene, naga mëna monar kuruta lau vena kila make kana sur ne la ve sur wa, amio mëna yeririna la naña apa ke ea. Ana kupaññaena na yo wa nae ma e peni, naga pe sa re kupaññaena na sur mal la naña akila ke e yo wa na yomarava nini poli, naga pe kupaññaena tai naña keviu manene la, a po lue ga. ²⁴ A kuruta na kupaññaena nene sike e marana ne Ntewa rui, komin kietä ñparin yaru

wa Kristo ñar pa loyumña e yo wa rui, naña pe yo wa re ga naña yar la amiyumñaen poli, ana yo wa nene yo wa lelaga napo, nane ma e peni. ²⁵ A pogos naña kila kienā kupapañaena nena, naga pe sa re naña ñarin yaru tañena wa la akila ke poli. La akupaña ga kuruta na sur mal lala, ana naga kupapaña ke si na kana kuruta. A silaga apa akila e kana yo wa nena yam taaga e kasa punu ga, la akila luen ga sanene pa ke ne, ana naga kila yam taaga nena ga, pe nakilaen re si pogos tai poli. ²⁶ Visae Yesu monar kila luen ga kienā kupapañaena nene vanon mlamulen viowa la naña yeririna la asumña akila lue ga pa ke na, kana kinasa sane siar e nasiiena na yomarava nini pimi tol nanagane, naga tamalele ga mñeke e lak torovia mlogue piowagan naña kana kuruta mlaue silaga.

Ana e naliganaren naña Ntewa pisir lua naga pe sa re nene poli. Naga pisu naña luas nen pog naña tesike e nanagane pimi ke lavis narui, ana kila Yesu pimi paemen ita mare ga na wa. Naga pimi mñalivin ita, kupapaña make nena kienā malena, mñene plan ñelaga na mlamulen viowa.

²⁷ E lepas naña ita yeririna lala, Ntewa kila sape temal e yomarava nini, ana yoko tokovio ea ñisi na temal sina vena teva e naliñereena, ²⁸ a e lepas kienā ne Kristo, naga mñena sa ke ga. Naga pimi mñalivi e yomarava nini, siraunia kupapaña naga ve na waren kieta nakoaena na mlamulen viowa lala, ana yoko naga imi mñaliv si yam ta ne, pe na ulen re si mlamulen viowa poli, ana ve na wereplan ita vetan nakoaena na kieta mlamulen

viowa. Sanene, ita topasine ke ga naga, tesape monar naga imi tamalia ita.

10

Nakupapaena kiena ne Yesu naga po la sane

¹ Tesitomyu li si navisaluaena marua kiena ne Mosis. Naga pisa mā sur wo lāpasa, ana pe pisawal make re navisaruruuen wo nāpa Ntewa sinenan sape Kristo kila imi mālivin ita poli, kila sane navisaluaena nene sane pe kulus ga, ana pe kana kinas re napo poli. Navisaluaena marua nena, naga sumā kila ke ga kana kinakinas la sanene, kana kinas nene sane kiena kūpapaena la nāpa akila silaga, maran taaga ga e kas punu ga, pe atorokin re poli, tāpatete akilavan make la nāpa akila ke lotena amio. ² Visae peraga, vera na la nāpa akila lotena sanene, aim amekiki ruru make wo ūisi, ve aloge re si sane mlamulen viowa sike e la, ve asitom re si kilaen kūpapaena, ana peraga, akila ke sina ga sanene silaga. ³ Kūpapaena lala, popon nāpa kila nāpa aninu sane pe kiela mlamulen viowa re si poli, ana peraga rui, e kas make ga apisu sane kūpapaena la nene akila sane asitomāl si kiela napiowaena lala, ana amloge sane kororak na kiela mlamulen viowa sike e la wa pano-o pimi piowa manene la. ⁴ La amninu ke sanene komin nāpa kiela sitomena ta sike na, nāpa asape kuruta na purwolu puluku pona kuruta na nane kilia yumu plan kiela mlamulen viowa sanape ne? Sur nene, asitom ūele pāpis, pano-o apisu

sane peraga, aþi þele yonia, kielo mlamulena viowa su mäga.

⁵ Ana komin sur ne la nanene, pogos naþa Kristo pitomi mälivin ita e yomarava nini, naga pisawal kieno mrappa viu narui. Naga mla visena tai naþa teke e tus na Yauen wa lala, pisa pa Ntewa Arimana, sape

“Ko na pe sinomän re si kuþapaena lala amio nalaena lala poli, ana okila ruru tasneu naþa yoko netamän van ko.”

⁶ Sur la naþa asikap lele ke ne, opisu apiowa ga, a nalaena la nakilaena mlamulen viowa ikiki, pe sinomän re nena ga.

⁷ Ana siraunia, nesumalu nepisawal ruru pan ko, nesape

*‘Ntewa in na nekekaran ga nekila ya naþa ko sinomania,
sur ne nanene in na nepitominia, sa ga naþa
Tus Marua sape yoko nekila.’” Yauena
40:6-8*

⁸ Ana popon tevisu ruru visena naþa Kristo pisa ne. Sur þes naþa pisa, pisa ke kuþapaena lala amio nalaena taþena la naþa asumña akilakila ke ne, pe sur korena ga naþa navisaluaena sape monar akila, ana Ntewa pe mloge re nena pon la, a pe sinenan re si sape akila poli. ⁹ Siraunia, sur na lua naþa Kristo pisa, naga sape tamän naga narui, vena imi kila nasinenanena kieno ne Ntewa.

E nene, tepisu mrappa na sumo na kilaen kuþapaena komin mlamulen viowa lala, Ntewa koven lua nena ga, ana kom ga e kieno mrappa na lua. ¹⁰ E mrappa viu ke nanene narui, Yesu Kristo

kila sa naña nasinenanena kiena ne Ntewa pisa, tamān make tasnena wetelu, nane kila narui tepim temekiki a tepe wa e marana ne Ntewa, sike sanene sulue narui.

Kuñapaena kiena ne Yesu naga sulue na sike ne

¹¹ Yar wa la naña asumña amiyumñae ke e ñelaga marua, monar la ñas naña e legiena make ga asike e Yo Wa. La asumña akila ke narin kuñapaena la silaga, naña akila lue ga maran taaga silaga. Kuñapaena la nene akila ke ne komin mlamulen viowa la naña yeririna la akilakila ke na, ana pe atorokin re nena naña akilia awar plan ñelaga na mlamulen viowa petan malena ken yar la poli.

¹² Ana kieta ñarin yaru wa naña Yesu, kiena kuñapaena na pe sa re nene poli. Naga kuñapain sur taaga ga panon mlamulen viowa make ga, a kila yam taaga ga, ana pogos naña naga kila pae, pa teke metava e yepas nena Ntewa na ñamarua. ¹³ Ntewa pisu Yesu kila mña sanene, na pisawal pisape yoko war nasinekar kiena Yesu lala, ligan la asike vatanonia sane takue tai naña yoko vilavan lana ea. ¹⁴ Pe yumñaena tañena re si ta naña yoko Yesu monar kila sanene poli, komin naga mla nalaen ñisi rui, naña kana kuruta kila ita temekiki, nanagane tepo rui e marana ne Ntewa, tesu ruru tesu mña sanene vano-o tañatete ñisi. ¹⁵ Ninuna Wa mñena miakol visena pan ita e lele nene, e visena ta pimi kome Navisawalena Seremæa. E visena nena, Ntewa pisa sanini sape

16 “*Ana nanagane, yoko nevisirlua si naviranarena viu tai nemio kiau yeririna lala.* *Ser 31:33*
E naviranarena nena, yoko nekila sanini: neligan ruru kiau navisaluaena lala sike e kielasitomena, nesiriar kiau visena lala sike e losinela.”

17 Ntewa pisa pa sanene ana sukol si pa la sane, pisa sanini sape

“*Yoko kielamlamulena viowa lala amio kielanapiowaena lala, tapatete si nesitomalia.*”
Ser 31:34

18 Visena nene pisawal ke pupia naviewoena naña Ntewa kila pan ita rui, ana visae ve sa kemua nene, pe nalaen tañena re si ta naña tekilia telavia komin naviewoen kiesta mlamulen viowa lala pona kiesta napiowaena lala, komin naña Ntewa kila ruru pisi rui.

Ve temaraun re va lavisinan Ntewa

19 Wolai a vineu lala, sa nena naña visena la nene apisa narui, kuruta kana Yesu pike mratavan ita rui, ana pe pon re si temarau poli, popon tokom ea teva loyumña e Yo Wa naña Ntewa sike ea. **20** Sumo na pupia kulmrae nene telan mono kiesta mrapa, ana pogos naña tasnena ne Yesu porovia, kulmrae mëna nene purpña lepas lua, pietavan kiesta mrapa na vaen loyumña. Nanagane tesike e mrapa wo ne narui, naña pe mrapa viu tai, a pe mrapa na vanonen malena.

21 Ana Yesu kila kiesta mrapa navaen loyumña e Yo Wa sanene, naga pimi pe kiesta pupia yar wa, naña naga pisuar make ita ga la naña na mratava puna ne Ntewa. **22** Kana kuruta war plan kiesta kororak napiowaena la naña sike loyumän ita,

kienā wii merarava kevan tasneta imi mekiki nena ga, ana ve temawa re sina, a tekilia teva loyumiā. Tekilia teva lavisin Ntewa naña sineta la ve lelaga, teviawa manene mārera e naga tesape yoko ve koven lua ita re, yoko naga worworun ita ga.

²³ Tekilia telelaga ruru tevisave yoko Ntewa kila wo ve sanene van ita, komin naña silaga, naga sumā kila nena taveve ya naña naga pisaaria. Ve tesitom ūle re sina, ana touarar ruru yumāena wo navisawalen va yar tañena lala sur tanea naña naga kila pan ita. ²⁴ Ana e ke sina ga e lepas na pun ita, popon tesitom ruruia, telual mrapa na yuren kieta sitomena lala vena sineta si manene ita la sane, a vena tekilakila ruru yumāena wo la van ita va laa sane. ²⁵ Pe pon re teligan ūlaga na viranar ruru itaen poli, sa naña yar lapas akila ke rui, ana popon teiilaar ita silaga. Ūlaga wo la nene, monar tekila lue ga van ita, a visae tevisu pogos mārera na legiena maro la asike lavisi narui, popon towo lue ga van ita sanene va mā ga.

Ve tesitom korenan re naliñereena kienā ne Ntewa

²⁶ Popon teviun naviunena e lepas na pan ita naña tetol nakiliaen la e visena lelaga rui. Teviunia tesape visae ve tevisuar ruru ita re, sane tesumālun naña tekila ruru ke mlamulena viowa, yoko ve sanapen ita narui? Navistañeena nena, sanini, mlamulen viowa la ne sanene, pe kana kuñapāena re si tai naña yoko war plan poli. ²⁷ Ya ga naña sike pa rui, nane

navisaarena kiena ne Ntewa nalaen nakoaena mārera vanonia, amio pupia lelen kapi naña yoko kekan make nena kiena nasinekar lala. Nanene naga pe sur tai naña monar temaraun vapisi. ²⁸ E navisaluaena marua kiena ne Mosis nanua sumo, visae yar tai kilaro kana visena ne tai, a visae yar ve lua pona ve telu avisave lelaga kemua, pe mrapa na sineyeena re si poli, yar nene yoko akilalua kiena malena veraga. ²⁹ Visae akila ve sanene va yar naña kilaro navisaluaena kiena ne Mosis, ana yoko ve sanapen yar naña pilon ke si māsina pa Narina ne Ntewa? Yoko naga kiena nakoaena ve keviu manene laa na wa, komin naña naga pārnena kare kuruta naña naviranarena viu naña kila naga mekik rui e marana ne Ntewa. Yoko Ninuna na lemamienna loge viowagan pēлага nene vapisi, sinen kar li yar naña kila na wa. ³⁰ Yoko monar war nakoaena nena, komin Ntewa pisaar sanene pā rui. Kiena Visena Wa tai sike e Tus na Visaluaena, naña pisa sanini, sape

“Nalipereen mlamulen viowa, naga kiau in ga taaga.

Yoko nelamaran si van la mārera na mārera vanon kiela naviowaena lala.” Nav 32:35
A e ke e lele nene na wa, visena tapēna pisa ke mēna ga sanini, sape

“Yoko Ntewa na mava lipere kiena yeririna lala.”
Nav 32:36

³¹ Monar tevisuar ruruia, komin yar naña kila mlamulen viowa, pogos naña aligan naga e limana ne Ntewa vena visu vevea, nanene na pe

narin sur re nene poli, naga pe sur namarauen ke nene narui.

Viawaena mārera navisuen sur nañpa yoko imi māliv na wa

³² Temninue kare narui amā yoko ve sanapen legienla ne pimi ke ne wa, ana popon tesitomāl luen ga mrapa wo la nañpa Ntewa miila ita ea, e legienla nañpa ñparo pa rui. Nanua pogos na tepim tomāliv e yomerarava, pe piavi re nena poli, tepane pogos mārera la papīsi, nañpa akila piowa manene la pan ita nañpa temlelaga ke e Yesu. ³³ Pogos la ñpasa, e ga e maran yar lala, akoven visena viowa la pan ita, a pogos tañpena lañpasa, akilapel ita ga e ñpelaga viowa la nañpa piowa na piowa manene la. Pogos lañpasa, pe akila re pan ita poli ana akila pa kiesta erau tañpena lala, ana tepea tesumāl tesu temio la, temiila la.

³⁴ Ita lañpasa, akoven la apa e yumā nakoaena, ana sineta miye la papīsi, tepanon tekilali nañpa teilia la vena towar plan re kielia pupia naloge viowaen nañpa apisu e yo nene. A pog tañpena si lañpasa, la nañpa sinela kar ita apimin kiesta sur lala, aþpar plan kare petan ita nañpa tekilalu manene la sur lala. Ana e pogos nene, pe sineta kar la re poli, tetamān ga, komin nañpa nasinekekaren tai sike e ita, sane sur la nañpa aþpar plan pavano lala ape na yomarava ga nini, ana kiesta sur nowo la nañpa apowo manenea asike ga wa, nañpa tañpatete akovio pog tai, yoko ave kiesta lue narui. ³⁵ Nane kiesta pupia naulua itaena nane nanene narui, nañpa yoko Ntewa la

van ita, ana komin naña nalaena tanea nene sike e marata, pe pon re si tekilapal nakiliaaren märera naña sike e ita poli,³⁶ ana monar tesumäl ruru nena märera tese Ntewa. Kieta sitomena la monar ve piavi ruruia vena tesumä tekila ga kiena nasinenanena ne lala, ana tekilia tetol sur la naña naga pisaar pan ita.³⁷ A pog na tolена, pona ve ve piavi re yo, yoko imi mälivin ita, sa naña visena kiena ne Ntewa tai naña navisawalena Aþakuk pisawalia, sape

“Yam ve plas la sina, ve ve piavi manene re, ana yerkawa naña yoko imi ne, naga taþatete si su laa sane, yoko imi mälivi nenaga.

38 E pogos nene, kiau yar mesmes lala, yoko amal ruru nenaga, komin naña amleлага e inu, ana visae nevisu lala yar tai yepen mavin inu, weresu si naga, yoko taþatete nena nekekarania-a ðisa.” *Aþa 2:3-4*

³⁹ Ana pe ita re nene poli. In na pe nesitom re nesape ita yar sur la ne sanene yoko temaraun Ntewa poli. La naña aþeresula sanene, yoko monar ava akovio ga narui, ana ita naviawaen märera ea, monar tetol malena.

11

?Naviawaena naga ya ne?

¹ Kieta viawaena nena, yoko tevisave naga sur ya na sanene? Tekilia tevisave naga pe þelaga na wasine ruruen Ntewa märera, naña kilia kila kieta sitomena kapuru ruru wo e ga e naga, a kilia kila kieta lelagaena märera, tesape sur la naña pe tepisu re poli, ana pe lelaga

naña asumña ga. ² Viawaena naga pe pupia sur tai papisi e navisuena kienan ne Ntewa. Siar e repita nasumo lala pimi, mrapa taaga nena nanene naña Ntewa kila sane kilia kekarana yaru. ³ Pelaga naviawaena ne nanene narui kila ita tepisu kilale sane pe lelaga kemua, visena kienan ne Ntewa ga sii make suria, kila kieta yomarava nini pimi mälivi. Kienan märeraena ne nane mla sur la naña yar tařatete visuia, miyumñaen make sur la naña tepisu sike ea. ⁴ Popon tesitomyu si repita na sumo lařasa, sanape naña la mëna apiawa e Ntewa nakonua.

Ta naña naga yermarua Epol. E kienan naviawaena e Ntewa, naga mlotun e nalaena ta naña mesmes pařisi, ana Ntewa kekarania, naga pisu po manenea taulu nalaena naña wenla naña Ken sinenan sape lavia. Ana Ken sinen mimi, mëmar wenla nena, ana ſelaga wo naviawaena kienan ne Epol e Ntewa kila Ntewa pisu sane naga pe yar mesmes tai, a suri nene kilia iila ita ke vim tol nagane na wa.

⁵ Tařena sina, nane yermarua Inok. E kienan naviawaena e Ntewa, naga pe tol re marena poli. Naga pe yermarua, ana Ntewa ga pitomi ſerelua naga, kovio e yomarava nini pa metava, ana akale pano-o pe amal re poli. Ntewa kila sanene pania komin pogos naña sike e yomarava nini, naga pe yar tanea tai naña Ntewa kekarana papisi.

⁶ Lelaga pařisi, visae naviawaen e Ntewa ve sure e ita, tařatete tekila naña yoko Ntewa kekarana ita. Yar a naña sinenan sape kilia Ntewa e kienan malena, sinenan sape imi lavisinia, naga monar

viawa manene sanini. Naga monar lelaga sane pe lelaga kemua pap̄isi, Ntewa sumā ga, a monar wasinea sane yoko Ntewa kila wo vap̄isi va la naña akale ke naga.

⁷ Yermarua si tai naga Noa. E kiena naviawaena e Ntewa, naga kila ya naña pisa pania. Ntewa pisawal pupia womie nene pania, ana pogos naña Noa pe pisu re nena kana kile ta poli wa, ana kila ga ya naña Ntewa pisa pania, kila kiela pupia waa nena vena namratava puna lala akilia amal ea.

Naviawaena kiena ne Noa nene e Ntewa tamalia la nene, kila m̄ena pupia nakoaena pimi m̄alivin make yar taþena lala e yomarava, komin naña pe amleлага re poli. Ana Noa naga pe na þegas kiena ne naleлагаena lala tai e Ntewa, ana Ntewa kila amesmes e marana.

⁸ Taþena si tai, naga yermarua Epraam. E kiena viawaena e Ntewa, naga mlogear ruru pap̄isi, molue petan yo naña sike ea, pa e yo taþena tai, naña Ntewa pisaar sape tamān vania. Naga mialin ke sape va ea, mminue kare sape amā kope ke na wa, ana komin naña Ntewa pio, naga pa ga narui. ⁹ Naga mial m̄ia pano-o, pogos naña pa m̄alivi ea, sa ga wolawa ga tai, ana purvanua ke naña Ntewa pisaar pan narui. Ana þere yumā tapolen m̄ene yo nene, sike e nene amio na mratava puna lala, sa naña narina lala, naña Aisak lala amio mapina lala naña Sekop lala, naña la m̄ena akus porotano nene naña Ntewa tamān pan la ve kiela lue. ¹⁰ Ana Epraam tol yo nene, sike ea, ana pe kila re pupia m̄ana yumā ta poli, m̄eke ga e yumā tapolen la

nañane. Naga nene komin naga kiliar ruru po pap̄isi sape pe m̄ana um̄a re napo nene poli wa, ana naga sukoko ga e nene na wa, vena yoko va e pupia pulkumali kiena ne Ntewa, naña Ntewa pisirlua a miyumñaen amio kana p̄eren m̄arera naña tañatete si wororowa pogos tai.

¹¹ Ta sina, naga sira marua Sera. E kiena naviawaena e Ntewa, naga m̄epenan p̄esan narina naña Aisak. Nakonua nena, pe p̄arli re sisi poli wa pano-o pimi pe sira marua, ana sumal m̄arera sike e naña sape yoko navisaarena kiena ne Ntewa ve lelaga vania amio wona yermarua Epraam, sape yoko lalua awar narila. ¹² Yermarua Epraam m̄ena ga sa naña mrae pito tano rui, ana narina naña paria kila namratava puna la apim ape mok pañisi. Ana siraunia aþarliluen la apitom sanene, pano-o kiena lus lala apim ape mok sane verue la metava ma e sinapane, tañatete si aulola, asaga mras nen none la garo losi narui.

¹³ Ana yermarua make la naña amleлага e Ntewa sanene, Ntewa pisaar kiela sur wo lala pan la, ana aþar ga kana narin kinakinas komp̄asa, ana amar tan yomarava nini. Ana akilia asape Ntewa p̄ar ligān ga lañasa sike ga wa, yoko warpo nakeviu sirau, ana kila apisu kilale asape ape wolawa ga e yo nena. ¹⁴ Yomarava nini naga pe kiela yo re nena poli, ana kiela sitomena sike e m̄ala um̄a tañena naña napo. ¹⁵ Ana visae yo naña asitom manenea naga purvanua ke naña amligan apim, visae la sinelania, akilia avilopu la awasuþe si ava e wo ga. ¹⁶ Ana peraga, pe kiela

sitomena p̄asupe re si pa e nanene poli, la asitom ke asape atol yo tapēna naþa po manene la sane, sinelan ga umā nae ma e peni. Ntewa kila ruru make kiela pulkumali wo nene rui, ana naga sinenan paþisi sape popon loge avisave naga pe kiela Ntewa kemua lelaga, a naþa avisave māna umā, naga ve māla umā lue narui.

¹⁷ Ana e lepas kiena ne yermarua ke la nene na wa, tevisayu si yermarua Epraam, naþa e kiena nakilaliena mārerera naþa naga pisuia. E kiena naviawaena e Ntewa, naga tamān nena narina taaga naþa Aisak pania, tamān sape kupapain ke sina ga vania. Aisak ke naþa nanua ne Ntewa pisaar mārerera pa arimana, sape

¹⁸ “E narumā nene, yoko kiomā

lus la aim ave moki.”

Jen 21:12

¹⁹ Ana pogos naþa Aisak lavis mare, Epraam pe kiena sitomena re poli e navisaarena kiena ne Ntewa nene, ana naga mleлага ke naþa sape visae monar wemār narina nene mare, Ntewa kilia tamalia si wo ga ne. Ana Ntewa pisu naþa kiena naviawaena pe lelaga sanene, ana Aisak pe mare re si poli, ana ariman pisu ga naþa Ntewa mla maran si malena kiena ne narina nene pania mligan e limana.

²⁰ Ana yermarua tapēna si tai, naga narina ne Epraam naþa Aisak. E kiena naviawaena e Ntewa, mla kiena visena maro pan narina lúa nene Sekop amio Esau, mleлага mārerera sane yoko sirau navisa ruruena imi van lalua sa ga naþa pisaar pan la.

21 Ana Sekop m̄ena nene sanini, e kiena naviawaena e Ntewa, p̄asine ga naga sane yoko kila wo van kiena lus lelein la naña avim sirau. Naga p̄ar narina naña Yosop, ana Yosop p̄ar narina la lua. Ana pogos tai, lavis repila marua naña Yosop kovio, sumalun kiena plasgai telan p̄arina pito tano vena lotun Ntewa, p̄isi na pisawal navisaarena navisa ruruena pan mapina la punu ga.

22 Arimala marua nene Yosop, naga m̄ena popon sa tesitorñalia. E kiena naviawaena e Ntewa, naga mleлага m̄arera sape Ntewa ve ligān re yeririna nae Israel la asulue Isip, ana yoko wereplan la awasuñe si e kiela purvanua wawa. Naga pisawal sanene, ana pogos naña kiena malena lavis p̄isi, pisa m̄ena sape visae naga mare, ve asin re mon Isip, monar akus vano-o asin m̄ene kiela yo.

23 Tañena sina naga yermarua Mosis, kiena yermarua lua. E kiela naviawaena e Ntewa, pe amaraun re navisaluaena m̄arera kiena ne Parin Suñe Pero poli, pogos naña narila nane Mosis paeme, apinaia naga pap̄isi, pe atamān re amem̄ar poli, ana akuswan naga mon momā ga, pano-o tol kupario telu.

24 Ana Mosis nene, naga m̄ena, pogos naña kapuru pa keviu pae na, naga m̄ena pe yar na lelagaena. E kiena naviawaena e Ntewa, pe sitom manene re e kia wo naña amla pania, sa naña Parin Suñe Pero narina naña sira, narina, **25** ana naga sitom manene la kiena lus tañena lala, yeririna na mratava kiena ne Ntewa. Naga

mligan umña mñana yar keviu, amio þelaga la na yomarava nini, naþa sane kana kekarena pe na þane ga ne, þisi na pa miakol amio kiena yeririna lala e malena na pog mñarera la naþa le Isip la akila ke pan la. ²⁶ E pogos nene, naga sumña sitom veve ke ga navisaruruena la naþa kilia imi mñalivin naga e pogos la naþa pimi siraú. Naga mnunun sape visae kus ke naloge viowaena amio la vanon yumñaena kiena ne Navisaarena, naga po manene la taulu naþa naga kus ke sur wo lala na malena memee ga e umña mñana ne yar keviu nae Isip. ²⁷ E kiena naviawaena e Ntewa, pe maraun re sur ya naþa Parin Suþe Pero kilia kila vania, ana naga mligan ga Isip sa naþa Ntewa pisa pania. Naga pe pisu re marana ne Ntewa poli, ana þar yon ga naþa logearia sa ga naþa pisu nena e kilamarana.

²⁸ Naga ke sina ga, e kiena naviawaena e Ntewa, naga þuarar ruru mrapa natamaliaena naþa Ntewa pisa pania, a naga kila kiena yeririna lala aplan ke kuruta na sipsip e mala pulutava lala, ana pogos naþa Ntewa mligan kiena navisi na marena pitomi vena la nakoaena va Pero, war ro ga kom metavan mala umña lala, pa mémear mearu na umña punu ga nae Isip. ²⁹ Ana siraun nanene, yeririna nae Israel la nene apûre matan Pero, amial apa atol Sive naþa Pivaga. E kiela naviawaena e Ntewa, akusro pupia sive nene apa lepas þasia, amial ke apano-o sa ga amial ke ga e porotano. Ana la nae Isip asirau apimin la, ana la mñena amial asape akusro sa ke ga, ana pupia sive nene pimi pranwo la sina,

kila talilun make la ga amarmare. ³⁰ Ana pogos naña yeririna nae Israel lala amial apa la sane apa atol pupia kumali naña Seriko, amio kienai li na mara la naña asike loyumña e kana pupia kove naña amiyumñaen e kilavaru telivi piora. E kiela naviawaena e Ntewa, la nae Israel amial atalivi e kumali nene pano tol legiena orai, pano-o tol legiena na olua, apisu naña Ntewa kila kove la nene amloloru veraga.

³¹ Ana loyumña e kumali nene, sira tai sumña ga, naña nanua sumo pe sira na mrapa, kienai kia Reap. Sumon, yar la lua navisu veveen yo kienai ne le Israel lala, la apa atapolou loyumña Seriko, ana pogos naña asike ea, sira nene perewan la e mñana yumña, miila la kevieu pañpsi. Yaru tañena la nae kienai yo, pe sinelan re avatanon Ntewa poli, ana e pogos na mara, amarmare, ana e kienai naviawaena e Ntewa, Reap pe mare re poli, atamalia kienai malena.

³² Nane repita marua la ñasia naña ape purþes nen yar naviawaena nakonua. Ana tekilia teva laa sane, vanon kia moki sike ga wa, sane yermarua la nene Kition, Parak, Samsen, Septa, amio Parin Suþe Tepet, amio mëna Samiuel amio navisawalena tañena lala, ana nepisu sane torok ga wa, pe aora torokin re poli naña nekilia nesiri plan kiela suniena la veve taaga e la punu ga. ³³ Pe lelaga kemua, visae teloge ga sunena la nene na, apo na apo. E kiela naviawaena e Ntewa, kietia yermarua lala akila pupia sur la moki. Yoko tevisu naña akila mara ataulu purvanua ñarera tañena lala, ana akila naña yeririna na yo viowa lala monar ayumñaæ ataveve

navisaluaena na po, ana am̄areran na tolen ya nap̄a akilia asape Ntewa pisaar pan la. Yeririna tañena lala akuwanla apito e ñiliñili na laion vena akan la, ana pe akan la re poli. ³⁴ Akuan la e pupia kapi, ana tañatete nena kekan la. Pogos lañasia apane playu na mara, ana aþure matan poga ga, a pogos lañasia li na mara la akila kare la m̄a pano-o pe puriula m̄arera re si poli, lavis ga ñisi. Ana siraunia, apisu ga nap̄a apa sina metava, am̄arerera manene pañisi, akila mara amio kiela li na mara na purvanua tañena la nene, pano-o ataulu la, am̄ene plan la aþasupe sina.

³⁵ Lala ñas amarmare e pog m̄arera la nene, ana ola la atagin la, ana amilan ga Ntewa mla si ninula pan la sina, pisir plan la amal sina.

La sina ñasia, nasinekar la akila yepe lalae moki pan la, a akilali la visae la avisave la pe amlelaga re si e Ntewa poli, yoko aligan la awasuþe la sina. A visae avisave asumña amlelaga ke ga e Yesu wa, yoko akila m̄arera la sane van la na wa.

Ana e pogos nene, yeririna lala kiena ne Ntewa asape visae akila m̄arera la ve sanene van la, poga ga, ana tañatete aligan kiela Suþe. Asitomñal ga asape e pogos nap̄a visae naga visirplan la sina, la sinelan sumñalen se marana nap̄a akekara, a ve amawan re sina.

³⁶ Lala ñasia apiar la, aþure la apa am̄e la e yometava e maran yar la nap̄a apisa kare la ke pañisi. La ñasia, pogos nap̄a apiar la, nane e sen urmi lala, akuan la ñararia e yumña na koaena.

³⁷ Lala ñas sina ga, akove momñar la, la ñas apiliro

la kom̄pas lua e sowa, ūasia atem̄ar la e playu na mara lala. La naþa visae ve amare re, la m̄ena ga sur m̄arera van la pa ūisi. Pe kiela sur re poli, limala plas pap̄isi, ūisi na asi plan ga kulus nen nane pona sipsip vena ayenia nakilaen yepela visusun. Sur la punu ga piowa lue ga pan la, a yar taþena lala pe apisuar la re nena ga, akila kare la keviu ūisa. ³⁸ Pe m̄ala um̄a re poli, a pe kiela yo re naþa ava e poli, ūisi na asum̄a amialialoro kar ga e yo mema a metava e tavia lala, asu kar ga e pulþe lala.

Nane yar na viawaena lala na sa nene. Yomarava nini na piowa manene la pan la, sa naþa tekilia tevisa tesape yomarava nini pe torokin re si yeririna wo la na sanene ase poli, yar la na sanene popon asum̄a ga m̄ala um̄a metava ma e peni. ³⁹ Tepisu sane la punu ga naþa tepisayu la pa rui, apane pog m̄arera la mok pap̄isi, ana pe amlor re poli, asum̄al m̄arera ga, kila temnunu kilale kiela naviaawaena e Ntewa keviu, a pe lelaga. Ana la ape na pog nane naviranarena marua nanua sumo, ana asum̄a amloge navisaarena wo lala kiena ne Ntewa, sane yoko naga kila mrapa naþa akilia atol malena naþa ve uro re, ana pe apisu re mras navisaarena nene molue pula poli. ⁴⁰ Ana Ntewa pisuveve sape popon kila mrapa viu tai van ita. Ana pitetalia Yesu pitom kila pae kiena yum̄aena, kila sane la nanua sumo ne, amio ita, ita punu ga towar mras na visaarena kiena ne Ntewa nene e mrapa ve taaga ga, a e pogos taaga ga.

12

Kilamarata sumña ga e Yesu, naña naga mārerera manene pano taulu pogos mārerera lala

¹ A la punu naña tepisayu la ñaro rui, la na sane ape pupia purp̄es nen viawaena lala, asa ga pupia ñegas nena naña asumal asumña apisuveve ita ke ne, asumña apisu ruru ke kieta viawaena, asape yoko tekirir va ve sanape. Sur ya naña suwo ke kieta mrapa, monar teyaslua, a mlamulen viowa la naña sumña piar kare ita ke ne, monar towarplania, ana tom̄areran kiririen e mrapa piavi naña sike e marata, naña sitomiena na liganena ve su re si e ita, kieta sitomen la ve piayavi ga.

² Tekira tevisuar manene Yesu, naña sumal sike e luas nen mrpa gare. Naga pe purp̄es nen mrpa na viawaena, a pe kana luas m̄ena ga, ana pogos naña tesitom̄alia, yoko la mārereraena van ita. Tekilia tesitomyu si pogos naña naga ñar ke yepe lalaea a naloge viowaena meta e lak torovia, naga sitom korenan ga pogos mārerera naña naga panea. Naga mligan kiena sitomena mārerera su ga e pupia kekarena naña sike e marana, kila m̄a pano-o taulua, ana nanagane teke e lepasnena ne Ntewa na ñamarua, e pupia lelena wa ma e peni. ³ Popon tesitomyu m̄a Yesu, e pogos naña yeririna viowa la nene akuan make visen viowa la pania, sinela kar manene papisi, ana naga tam̄an ga naga pano tol luas. Sanene, ita m̄ena popon ve sineta maren re yum̄aena vilaga, a tañatete temaraу, ve tesitom re urmatanen ya naña monar tekila. ⁴ Pona

tesitom ke tesape temloge piowagan kilaen mara temio ſelaga viowa ana torok yo narui, sineta mare, ana pe tetol re ya naña Yesu kila poli wa, pe tesu wo li re mlamulen viowa poli wa, pano-o kata kuruta mlau e yepeta. ⁵ A popon ve sineta pesan re visena na iilaren naña Arimata Ntewa pisa pan ita, sape pio ita sane narina lala, sape “*Naruu, visae nevisu popon sane naloge viowaena tai imi tol ko, ve ositom korenan re, pona visae yam lañasa nevisu sane monar nela nakoaena van ko, kiomña sitomena ve lor re, komin kiau ſelaga navian koena naga sanene.*

⁶ *Visae la naña sineu sii la, yam lañasa monar nekila aloge viowa,*
a la naña nepe Arimala, yam lañasa monar nowela.” **Pakaiwa 3:11-12**

⁷ Sanene, visae pog tai ovisu sane ve sanene van ko, monar om̄arera, otamān ga sane mrapa ke tai naña Ntewa sinenan sape vian ko e narui, sinenan sape kila ruru kiomña malena ne. Ita punu naña tepe ata, tesumña tekila ke sanene pa narita lala, ana visae Ntewa pisu ita sane narina lala, naga monar kila m̄ena ve sa ke nene van ita.

⁸ Sur nene naga yoko ita make tetolia, a visae ve kila re van ita tai, naga pisu yaru nena sane pe pe narin ruru re napo poli, naga pe narin yar nae ga koyo tai. ⁹ A nanua sumo, ita make ga, pogos naña arimata la amla ke nakoaena pan ita, pe sinetan re poli, ana pe lelaga, nenaga ne tepisu kilale sane amesmes ga, a kila sane tesitom la va la sane. Ve sanene na, popon manene tevatanon Arimata e ninuta, tekekaran ya naña kila pimi

m̄alivin ita, vanon naga ke nene narui pe mrapa na malena.

¹⁰ Arimata lala amla ke nakoaena pan ita e kas la naña tepe sisi ke ga wa, akila sanene komin asitom asape yoko wo la sane van la ke sina ga, ana pogos naña Ntewa mla nakoaena pan ita, kila vena yoko wo ke sina ga van ita, vena ita m̄ena ga tekilia tetol kiena malena wa.

¹¹ Nakoaena pe sur tai naña e ke e kana pog na kusena, pe kiki re nena ga, melkalka pañisi. Ana siraunia, visae tetam̄an naga vian ruru kiesta malena, yoko war mras napo lala, sane ñelaga na mom̄auena a sum̄arena, amio ñelaga na waena a na mesmesuena. ¹² Ve sanene, visae sur ya naña avitaweria, amiu akilali sane navisawaliena Aisea pisa sumo, naña sape

“Avisir plan limamiu la naña tayoi sike ne, akila la akulul sina, a purpur na lamiu la naña miyuyuwawa ke ne, akila la am̄arera sina.”

Ais 35:3

¹³ Sanene, amiu m̄ena ga akila ruru si kiamiu mrapa la amesmes ruru wo, ana kiamiu laulu la naña ayaloro atavevea, yoko lala ve viowa manene re la sane, ana yoko imi m̄arera sina.

Avisuar ruruia ve akila pal re mrapa

¹⁴ Sur lua na waryoen silaga la sanini. Tai, naga ñelaga na ve erau woena amio yeririna tañena lala, a ta sina, naga ñelaga na malena wa naña yaru monar se ea visae sinenan sape visu marana ne Ntewa na mavá. ¹⁵ Ana monar ayum̄ae m̄arera vena ve amiu yar tai naña kirir m̄a pano-o ñisi ga e mrapa komsusia, naña pe tol

re lemamien a kien a ne Ntewa poli wa. Ovisuar ruru m̄ena ga naña ve narin ūeliga melkalka ve imi tawa re e sinem̄a. Visae pere, p̄isi na kapuru war mras la ve moki naña piowa e kiom̄a malena, a kana kororak ne la ve kila kare re malena wa kien a ne li na lelagaena wa tañena lala. ¹⁶ Monar ūeliga viowa na yerm̄ene amio sira ve imi re e amiu, a monar ve ūeliga nasinep̄esan ruruen re Ntewa, sa naña Esau kila nanua sumo. Esau nene, Ntewa kilologia naga pe m̄earu kien a ne arimana vena kilia war lalimana ve kien a, ana pogos tai naña visokaria, mlopon ponos nen pursi wo naña wenla na vetokaki Sekop miyunñaenia, ana mias lua sitomien a kien a ne Ntewa e kien a malena, pisa pa wenla, pisape “Ei, ola pursi nene im van inu nagane, a lalimana ne ata make ga naña pe kiau, ana nela vaniko.” ¹⁷ Ana sa naña tekilia pa rui, siraunia Esau pisa sape yoko war maran si lalimana ne arimana ve kien a, ana apisaluñpar ga, vanon naga p̄iliwilin plan rui. Ana mloge piowagania, tagi pano-o kila p̄ele ga rui. Naga sitom ke sina ga, sape sa ve kila re ga, ana nagane kilalu rui.

Tavie naña Sinae na yomarava, amio tavie naña Saeon nae peni

¹⁸ Ana popon tesitomli si ve tokak ga e lepas nen navisaluaena na sumo wa, amio lologena wo kien a ne Yesu Kristo naña pimi ga na wa. Sur lalua nene pe tañena pañpsi, ana sur nene tekilia tevisu kilale e kala tavie la lua.

Tavie na navisaluaena marua, nane Tavie Sinae, naña na yomarava ga nini. Kieta li marua le Yu lala akilia apisu e kilamarala, ana apisu sane pe pupia yo wa na marauena, naña kap mēke ea a kana pulpalu ne lala yo malolo ga rui, amio kan yaku nena naña yemalolo kalo make ga, a lagi tai miyui lue ga ea. ¹⁹ Ana pupia kana kumasua nena miyelyelu mñalia, ana amloge pulgo tai pis naña urmi pañisi, kila sane amarau pano-o, atag asape ve visa re si sur tai van la. ²⁰ Apisu sane yo nene pe wa pañisi, akranwo ruru nena, sane visae sur mal ya naña waro lavisin tavie nene, kus pal laea, yoko monar akovemñaria. ²¹ Ana yermarua Mosis pisu sur la nene, naga mēna marau, pisape “Lelaga nañane, nemiyuwawan ga marena.”

²² Naga nene tavie wa na navisaluaena marua na sumo, ana nanagane na pe tepe re si e poli, tepim e tavie wa viu na lologena wo nene na Tavie Saion. Naga sike ma e peni, naña pulkumali kiena ne Ntewa mali mēke ea, naga pe Yerusalem viu ne nae yo mavá. Naga pulen ga navisi lala, mok na mok naña sane apulopule ga, naña asuvileviles kar ga vena kilaen yauena na kekarena. ²³ Ana likan la, ita ñegas na li na lelagaena wa la tesike lele taaga ea, naña ita tepe sane mēaru lala kiena ne Ntewa naña teþpar lalimana. A amio ita mēna, ninuna ne kieta yar mare lala asike ea, nane la naña amesmes ruru pa rui e yomarava, ana pogos naña amare, aþpure plan la apa atol luasnen mrapa natamaliaena, naña apa asu ruru e yo nene. A yaru naliþereena

m̄ena tai totano teke metava e yo nene, naga pe Ntewa na sur make ga. ²⁴ A amio sur wo tap̄ena la nāpa asike e kieta kunus wa nalologena wo nene, tekilia tevisu Yesu, amio kana kuruta nāpa mlau, nāpa apeven pa e losineta lala vena kila temekiki. Kana kuruta nena, pe sa re kuruta kana ne yermarua Epol nanua poli, nāpa asape kuruta na ween yaru, a kuruta na kilamaranen napiowaena, ana kana ne Yesu naga pe kuruta na tamaliaena yaru, a pe kuruta na viewoena. Yesu kila po pāpisi wa, nāpa sumāl su likan Ntewa amio yaru, kila kiela naviranarena viu lalua sumālu ruruia, vena kila lalua ave erau wo sina.

Ayagogon ruru pulgona ne Ntewa

²⁵ Navisaluaena marua, naga sane visena na kilāpegeena ta nāpa paeme e yomarava nini, a lologena wo, naga sane visena na kilāpegeena ta nāpa pitom ma e peni. Ana la nāpa apilon m̄asila pan navisaluaena marua nene, tap̄atete nena aurmatan nakoaeena p̄isa, ana visae ve sanene, yoko ve sanapen la nāpa apilon m̄asila pan lologena wo? Yoko tap̄atete nena aur matan ve tokaki. Visae ve sanene, popon teyagogon ruru pulgona ne Ntewa, telogearia. ²⁶ E pogos nāpa Ntewa pis pa yermarua nasumo la nene, kienā visena urmi pāpisi kila yemninu, ana siraunia, kienā visaaren tai pisa si mon metavania, sape “Yoko Yam si tai nokululun make yo punu ga, ve yomarava re ga nini, a amio make yo la ne ma metava Yam veraga.” *Akai 2:6*

²⁷ Visena naña pisa e nini, naña sape “Yam si tai,” naga pisa ke sur keviu ta ne. Naga kana kinasa sape Ntewa kululun yo yam tai rui, ana kiena sitomena märera sike ga wa sape kululun li si yam tai ana visu ruru li make ga suria. E legiena maro yoko kululun wowa yomarava nini, amio sur make naña naga sii la sike ea, ana yoko sur naña tañatete kululun rovia yoko sumal märera sulue na sike ne. ²⁸ Sur ga tai naga kilia su lue na sike ne sanini, nane nasuñenena kiena ne kieta Ntewa nena, a potena papisi naña mligan kieta malena su ruru sike loyumña ea. Popon silaga tekila lotena wo tai vania naña kilia kekarania, tepisu kilale naña naga pe na wa papisi, tevatanonia. ²⁹ Komin kieta Ntewa naga kapi ke nene narui, naña kilia sikap van make sur punu ga.

13

Pelaga la naña Ntewa kekarania

¹ Visen si lañas nini vena iila amiueno, naga sanini. Popon asumña akekarano amiu lue ga, sa naña kam na ape mratava taaga ga amio Kristo. ² Ana ve akekarano amiu re ga, akekarano ke mëna wolawa lala, akekarano naña avisuar la e mëmamia umña lala. Popon akilakila sanene, komin pog lañasa, kam na amninue ga, ana wolawa la naña apisuar la ke ne, la na navisi kiena ne Ntewa ke la narui. ³ Asitomal la naña asike e yumña nakoaena, awar pae kiela naloge viowaena lala, sa ga naña akoven amiu mëna apa asike amio la. Kam na ve sinemiu ñesan re mëna la naña yar tañena

la asumā akilakila kare la ke silaga, komin ita punu ga tesike e yomarava nini, a monar tokus pae pogos mārera la naña yoko tevisuia.

⁴ Popon yar make ga avisu kilale ūelaga na talopaena naga pe sur wo a pe sur wa mēna ga, a komin sur ne nanene, pe pon re si kororak tai imi kila kare tog naña añaenia pe māla lalua naña atalopa, komin lalua apisaaria asape yoko ve aure re si tañena. Yoko Ntewa la na lipereena va la naña amiyalyal kar ga, sane li na talopaena naña akila kolau, pona yar viu la naña akila lau.

⁵ Ovisuar ruruia naña ve oligan re kilavaru imi ve suri na sumo e kiomā malena. Popon okila ko okekaran ga narin ya naña teke e lumomā rui, komin navisaarena kiena ne Ntewa naña sike pa rui, pisa sanini, sape

*“Tapatete neligan ko yam tai, tapatete nevilon
māsuu van ko.”*

Lev 31:6

⁶ Ana pogos naña tesitomyu si naga nene, mla si namāreraena pan ita, vena tevisawal visena naña sike e Tus na Yauena lala, pimi pe kieta visena, naña tevisave

*“Yar na iila ruru inena, naga Ntewa na mava ga,
ana ve nemarau re si narui, yoko yar tañena
kilia kila si ya ne viowa van inu ne?”*

Yauena 118:6

⁷ Sur tañena, popon asitomālar mā kiamiu nasumonena lala, naña apisawal ūesan visena kiena ne Ntewa pan amiu. Avisu veve ruru mras naña molue kome ūelaga wo na kiela malena, a akila ga nono na kiela lelagaena mārera e kiamiu malena lala. ⁸ La amlelaga ruru po, ana ita mēna tekilia telelaga, komin Supe Yesu Kristo

naga piloulou re pogos tai poli, naga maran taaga sa ke nakoneva, ūpane, a peni, salue na sike ne.

⁹ Popon tevisa mēna tevisave avisuar ruru amiun visena kar taþena lala amio navian wownen lala ve aim aure plan amiu re vetan kove wo naþa kam na asike pae rui. Yar laþasa asitom manene la e ūpaþagena wa lala, amio kala kinanena ne lala, ana kinanena la nene taþatete nena iila kiela malena lala. Sur taaga ga naþa kilia kila sineta la m̄arera ruruia, nane lemamiena kienanena ne Ntewa pimi pan ita. ¹⁰ Kinanen la ne tai ne sanene, naga nane kilam̄iu na kuþaþaena lala naþa yaru wa la akuan ke e wonta. Amlenwoia, akila pa yum̄aena la e narui, ana siraunia akania sa naþa akinan kala ke narui. Yar wa la nene la amal ga e kinanena na wonta la nene, ana ita naþa temleлага e Yesu, ita na pe tekinan re e wonta nene poli, ita na kata wonta taþena m̄eke na, naþa temal e kana kuþaþaena nena naþa akuan su ea, naþa yar wa la pe apisu kilale re poli, a la taþatete akinana ea.

¹¹ La asum̄a akila ke kiela kuþaþaena la nene, ana tai na pe taþena towe laa sane, sa naþa asape kila totou na marena kienanena ne Yesu, kuþaþaena nena naga naþa asape na lakorenanena na viewoen mlamulen viowa, ana pogos naþa ūparin yar wa kila naga, naga pe kus make re tas nen sur mal pa loyum̄a naþa pe yo wa manene poli, ana ūpar ga kana kuruta, pa mligan se wonta. Ana tas nen sur mal nena, akuslua si petan um̄a, akus pa vanua, ana askapia.

¹² Naga sa nenaga naþa Yesu kila, naþa akus

m̄ena naga pa vanua e purkove na pulkumali, akila mloge m̄a piowa pano-o kana kuruta mlau make nenaga, naña pe mlau koren re poli, ana mlaun naña kila ita kiena yeririna lala tepim tepe yar wa ruru nena napo lala e marana ne Ntewa. ¹³ Ana komin naña Yesu kekaran sape kila ve sa nene vanon ita, ita m̄ena ga monar tekekaran teva tesumāl tesu temio naga vanua e umā, yar la avisu kare ita sa naña apisu kare naga, tokus naloge viowaena ve sa ke ga naña naga kusa. ¹⁴ Visae viowa ga van ita e yomarava nini sanene, sanene na pogaga ne, komin naña pe tesitom re tesape yoko tesike e pulkumali tai e nini ana tesulue poli, ana temligan kieta sitomena sike ga e m̄ata umā napo e pulkumali viu naña tepanon ke rui.

¹⁵ Popon kemua tesitomāl lue ga naña Yesu kila po manene la pan ita, naga pietavan ita e mrapa rui ana silaga tekilia tevisa potena va Ntewa vanonia. Ve tekila re kuþapäaena e sur mal la vania, ana nalaena tai tomā ga naña tekilia tela luen ga van silaga, naña yoko kekaran vāpis, naga nalaena na yeluarena. Tesumāa tepisirlua ke kiena kia sanene, ana visena nagota ne lala sa ga mralak tai naña kiki ruru nena po pania. ¹⁶ Visae sanene, ve sineta þesan re naña tekila yumāena wo lala, komin naga sane kuþapäaena naña tekilia tela va Ntewa. Tai naña naga kekaran manene la sane, naga sanini, sape tekila luen ga wo va yar taþaena lala, tekekaran ga naña teviovion kieta sur la temio la.

¹⁷ Sur si laþasa, sane monar telogear kieta nasumonena lala, monar tekekaran ga naña

tesu vatanon kiela visena lala. La aþion ke pap̄isi naþa avisuar ruru ita, komin naþa pupia yerkawa kerkeviu la naþa asu metavan la asum a apisu veve ke kiela yum aena a kiela þelaga m ena lala. Visae kieta nasumonena lala, kiela sitomena la marmare, ana yoko yum aen make ga va viowa nenaga, ana visae telogear ruru la wo, yoko kila yum aena ve urmi manene re van la, akekarania, ana yoko wo manene m ena van ita, yar na yum aena lala.

¹⁸ Pogaga, lavis ke visena make la þisp is narui, ana sinemimin mesape mevium m ena tan amiu mesape asitom al imimi e kiamiu leniena lala, vanon yom arera naþa mesike e nanagane. Pe mepisu re sur tai piowa teke e imimi poli, kiamimi sitomena la merarava ruru ga, a mesum a mesum alu m arera lue ga mesike e þelaga wo la naþa mesmesu e maran yar lala.

¹⁹ Ana sineun nesape visena la nene akila ruru vilaga, vena nekilia neviaþa e nini ve ve piavi re nowasuþe si neim as pun amiu. ²⁰ In na nesum a nemlen wo amiu ke m ena ga, nesape yoko Ntewa iila amiu. Naga pe Ntewa na sum are, naga pe Ntewa naþa sinena miye ita kienasipsip lala, ana pitetalia kieta Suþe Yesu pitom e yomarava nini, pitom pe yerkawa na visuaren kieta sipsip lala, kana kuruta mlau vena visirluaen naviranarena viu naþa yoko sike sike nena. Naga pe Ntewa m ena naþa Yesu tam an kienamalena pania, ana naga þerelua petan marena, pisirlua malia sina, ²¹ ana noþasine naga nesape yoko la sur nowo make ga naþa kam na sinemiun ke nanagane vena kilaen kienayum aena e yomarava nini sa

naña sinenania. Naga sumña miyumña ke e kieta malena la pe ve taaga, komin Yesu Kristo sumña miyumñaen ke kieta ūelaga wo vim ve sa naña naga sinenania, ana yoko teieluar manene naga vanon vano-o taþatete þisi, Sanene.

²² Na mratava pun inu lala e Kristo, nesiri mäki nini pimasa pan amiu, pona visae ve ve piavi manene re yo, ana visae avisu ve sanape kam na ve sinemiu karin re, ana kam na ala kiau visena na iilaen la naña sike ea.

²³ Sineun nesape nevisawal van amiu aloge kieta wolai naña Timote, amligan lua si naga molue petan yumña nakoaena rui. Visae ve ve piavi re imi kom e nini, yoko imimi lua, meimäs mevisuveve amiu.

²⁴ Sinemimin mesape avisawal va kiamiu na-sumonena lala, amio mäna yeririna taþena lala kieno ne Ntewa, avisave mepiun ke mesape la asike sanape, asururuga pona sanape? A le Italia la naña asike e nini la mäna sinelan asape avisa pokolemalo van amiu. ²⁵ Kiau visena maro nae e nini, nane nesiri van amiu narui, nesape yoko lemamiena wo a sinewo kieno ne Ntewa sike amio amiu make ga.

**Lologena Wo Kienane Yesu Kristo Kome
Kewo**

**The New Testament in the Lewo Language of Epi
Island, Vanuatu**

**Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019
ee028e1c-7e53-571d-8041-681daaf580e8